






DISPUTATIO CHEMICA INAUGURALIS

DE

ACIDORUM

MURIATICI ET OXYMURIATICI

CONSTITUTIONE.



DISPUTATIO CHEMICA INAUGURALIS

DE

ACIDORUM

MURIATICI ET OXYMURIATICI

CONSTITUTIONE;

QUAM,

ANNUENTE SUMMO NUMINE,

EX AUCTORITATE REVERENDI ADMODUM VIRI,

D. GEORGII BAIRD, SS. T. P.

ACADEMIÆ EDINBURGENÆ PRÆFECTI;

NECNON

AMPLISSIMI SENATUS ACADEMICI CONSENSU,

ET NOBILISSIMÆ FACULTATIS MEDICÆ DECRETO;

Pro Gradu Doctoris,

SUMMISQUE IN MEDICINA HONORIBUS AC PRIVILEGIIS

RITE ET LEGITIME CONSEQUENDIS;

ERUDITORUM EXAMINI SUBJICIT

JOANNES COUPER,

Scoto-Britannus.

Kalendis Augusti, hora loquoque solitis.

EDINBURGI:

EXCUDEBANT ABERNETHY & WALKER.

1816.

c

PATRI SUO CARISSIMO,

GULIELMO COUPER,

VIRO PROBO,

INTER ARTEM APOLLINAREM FIDELITER FACIENDAM,

ANIMUM STUDIIS LIBERALIBUS

NUNQUAM NON EXORNANTI,


FILIUS,

VESTIGIA PATERNA SEQUI EXPETENS,

HAS STUDIORUM PRIMITIAS,

ANIMO QUO FILIUM DECET,

SACRAS ESSE VOLUIT.



NECNON,

THOMAE CAROLO HOPE, M. D.

REI CHEMICAЕ IN ACADEMIA EDINBURGENA

PROFESSORI,

CUJUS A PRAELECTIONIBUS PRAESTANTISSIMIS

SE RUDIMENTA CHEMIAE HAUSISSE,

SEMPER MEMINISSE JUVABIT,

TENTAMEN HOC RUDE,

EA, QUA PAR EST, OBSERVANTIA,

OFFERT

DEVINCTUS AUCTOR.

Quaquam igitur multa sunt, ad ipsas artes non pertinentia, tamen eas adjuvant, excitando artificis ingenium. Itaque ista quoque naturae contemplatio, quamvis non faciat medicum, aptiorem tamen medicinae reddit.

CELSUS.

D^r Freer

with respectful Compl^t
from his late pupil
The Author -

DISPUTATIO CHEMICA INAUGURALIS

DE

ACIDORUM

MURIATICI ET OXYMURIATICI

CONSTITUTIONE.

SECTIO PRIMA.

OPINIONUM DE CONSTITUTIONE ACIDORUM MURIATICI ET OXYMURIATICI EXPOSITIO.

QUONIAM mihi laurum medicam ambienti, secundum leges hujusce almae academiae, aliquid scribendum est, de rebus *chemicis* dissere-re statui, quia scientiarum omnium, quas medicina amplectitur, *chemia* meo animo longe gratissima videtur. Constitutionem tamen *chemicam acidorum muriatici et oxymuriatici* indaga-

re decrevi, haud certissime vel quia ex his meis laboribus clariorem rebus antea obscuris lucem effulsuram esse inepte sperarem, vel quia aliquid novi aut in experimentis aut in opinionibus prolaturus sum. Altiora haec peritioribus linquenda. Mihi sat erit, in *chemia* tyroni, sententias aliorum rite exponere, atque inter eas invicem discrepantes, si quid possem, dijudicare conari. Dum haec ergo humiliora petens hanc rem perdifficilem aggrediar, me neque nimium meis dotibus confidere, neque opus praeter vires tentasse, existimandum esse spero.

Corpora etsi sunt perpauca, quorum proprietates quam *acidorum muriatici* et *oxymuriatici* melius cognoscuntur, illorum tamen de constitutione non solum *chemici* priores sententias saepenumero mutabant, verum etiam hodierni adhuc late inter se dissentiunt. Antequam *acidum oxymuriaticum* experimenta *Scheeliana* patefecerant, et dum *hypothesis phlogistica* adhuc apud omnes vigeret, corpora, quae nunc *acidorum bases* nominantur, ex *acidis* et *phlogisto* invicem conjunctis constare, ideoque

acida ipsa hisce corporibus esse simpliciora, *chemici* crediderunt. *Acidum muriaticum* inter *acida* alia positum iis similiter constitui haud dubitarunt, substantiam etsi, quam *phlogisto* sociatum genuit, se tunc temporis ignorare dixerunt.

Hac autem de sententia discesserunt *chemici* anno MDCCCLXXIV, cum SCHEELIUS de *acido oxymuriatico* experimenta in lucem protulit. *Acidi muriatici* in *oxymuriaticum* metallorum *calci- bus* mutati, ratio opinionibus tunc vigentibus convenire non potuit, nisi aliquid *phlogisti acido muriatico* inesse crederetur. SCHEELIO igitur *acidum oxymuriaticum* corpus esse simplex, atque *acidum muriaticum* ex hac substantia et *phlogisto* componi placuit; qua in sententia eum secuti *chemici* omnes, usque dum *hypothesin phlogisticam*, opinioni Gallicae cedentem, penitus subversam viderunt.

Secundum opinionem, quae tunc temporis apud *chemicos* Galliae prodiit, *acidis* omnibus *oxygenium* inest, dotumque, quae hisce corporibus propriae sunt, fons est atque causa. *Acidi-*

dum certe *muriaticum* in elementa sua resolvere non potuerunt; cum vero *oxygenium acidis* in omnibus resolutis reperitur, id *acido muriatico* quoque inesse credentes, se haud multum errare posse existimabant. *Acidum* igitur *muriaticum*, *acidis* aliis prorsus consimile, ex *oxygenio basi* alicui incognitae adjuncto constare, et *acidum oxymuriaticum* tantum, quod plus *oxygenii* continet, ab eo differre dixerunt.

Res tamen multas, quas hac doctrina explicare nequibant, cito invenerunt *chemici*. *Acidum muriaticum* e compositis, quibus inest, dissociari nequit, nisi vel aqua vel aquae principia adsint; et quando *acidum oxymuriaticum* in *muriaticum*, *hydrogenio* addito, vertitur, nullam aquam deponit. Harum rerum aliarumque ejusmodi ut rationem redderent, *acidum muriaticum* per se existere non posse, sed *muriatibus* aliisve compositis abstractum permultum aquae semper continere, Galliae *chemici* asseruerunt. His autem non omnes assentiri voluerunt. ONUPHRIUS DAVIUS Eques multique alii ad opinionem *Scheelianam* aliquatenus redeuntēs,

acido oxymuriatico locum inter elementa dederunt, *acidumque muriaticum* ex illo atque *hydrogenio* constitui contendunt.

Hae omnes opiniones jam nunc obsoleverunt, praeter Gallicam et *Davianam*. De his igitur paulo fusius dicendum.

Qui adhuc opinionem Gallicam amplectuntur, *oxygenium* esse principium sive rem generatricem *aciditatis* credentes, *acidum muriaticum* ex *oxygenio* et *basi* quadam conjunctis, constare autumant. Hujusce *basis* naturam adhuc prorsus ignorant, *acidi* enim elementa invicem dissociare nequeunt. Neque *acidum muriaticum* ipsum unquam corporibus aliis subductum obtinuerunt. Illis tantum notum est vel cum *alcalibus*, *terrīs*, *oxydisque* metallorum in conubio, vel forma aëria donatum, et cum aquae copia quadranti sui ponderis aequali arcte sociatum. *Muriata* in elementa sua calore etiam maximo resolvi nequeunt, modo aqua penitus absit: aquae autem si pauxillum praebeatur, tunc calor facile *acidum* expellit, quod aquae conjunctum *gas muriaticum* gignit. Aqua igi-

tur ad *gas muriaticum* constituendum prorsus est necessaria. Haec autem aqua ab illa multum differt, cui *humoris hygrometrici* nomen *chemici* dederunt; neque enim per testimonia solita detegi potest, neque ab *acido muriatico*, ut ab aliis aëriis naturis, per substantias eam sibi valide attrahentes, abstrahi potest. E contrario, aqua atque *acidum* adeo arcte inter sese consociantur, ut nullo pacto invicem disjungi possint, nisi, cui adjungatur *acidum muriaticum* corpus aliquod praebeatur; et tunc aqua, composito novo calorem adhibendo, obtinetur.

Huic *hypothesi* si credamus, *acidum oxymuriaticum* ex *oxygenio* atque *acido muriatico* constat, corpusque est *chemicis* quam *acidum muriaticum* notius, illud enim forma aëria praeditum, corporibusque aliis omnino disjunctum, exploraverunt. Nullam praeter consuetudinem in aquam *affinitatem* exercet; nihil enim aquae nisi quae his modis, quibus *chemici* ad *gasa* desiccanda utuntur, facile abstrahatur, *gas oxymuriaticum* retinet.

Acidum denique *muriaticum* majori copiae

oxygenii quam, quae *acido oxymuriatico* inest adjunctum, *acidum hyperoxymuriaticum* gignit, a quo et *alcalibus, terris, oxydisve* metallorum coëuntibus, sales *hyperoxymuriata* dicti, nascuntur.

Doctrina, quam ONUPHRIUS DAVIUS Eques protulit, et opinionibus jam dictis opposuit, haec est.

Pro certo atque admisso habens corpora omnia, quae in simpliciora resolvi nequeunt, ipsa simplicia perhibenda esse, *acidum oxymuriaticum* inter elementa locavit, idemque propter colorem viridem *chlorinum* nominavit. *Acidum muriaticum* ex *hydrogenio* et *chlorino* constare credit, quia cum *gasa chlorinum* et *hydrogenium* mensuris aequalibus commista, luci solis objiciuntur, et *hydrogenium* et *chlorinum* evanescent, et *gas muriaticum* nascitur. *Acido muriatico* aqua nulla, ut *chemici Galliae* affirmant, retinetur; nullam enim *gas muriaticum* unquam deponit, nisi corpus aliquod, a quo *oxygenium* praebeatur, adsit, et tunc tanta solum aqua obtinetur, quantam *hydrogenium aci-*

di muriatici oxygenio, corporis admoti sociatum formare debet.

Corpora, quae vulgo *muriata* appellantur, ad expulsionem humoris finitam calefacta, ex *chlorino* suisque *basibus*, non ut in salibus mediis *oxydatis*, componuntur. Hisce autem *muriatis*, si aquae pauxillum adjiciatur, tunc in *oxyda* cum *acido muriatico* sociata, ut ea *hypothesis* altera depingit, revera convertuntur; aqua enim in elementa resoluta, *hydrogenium chlorino* et *oxygenium basi* ad *acidum muriaticum* et *oxydum* gignendum suppeditat. Pari ratione, si *muriati* nondum exsiccatō calor adhibeatur, aqua chrystallis propria primo avolat, *hydrogenium* dein *acidi* atque *oxygenium* quod *oxydum* praebet coëuntia aquam constituunt, quae quoque expellitur, *basi* et *chlorino* unicis in conubio relictis.

De constitutione *hyperoxymuriatum* apud *chemicos*, qui has opiniones amplectuntur, haud parum disputatum fuit. Hos sales nullum *acidum* continere, sed ex *chlorino*, *oxygenio* et *basibus* propriis constitui ONUPHRIUS DAVIUS

Eques docuit. LÜSSACUS autem *hyperoxymuriati barytae* in aqua soluto *acidum sulphuricum* dilutum, usque dum nullum *precipitatum* demissum fuit, adjiciendo, praeter *sulphas barytae* insolubile, substantiam quoque novam proprietatibus omnibus *acidorum* gaudentem solutam obtinuit *. Hanc substantiam ex *oxygenio* et *chlorino* componi reperit, eamque *acidum chloricum* nominavit. *Acidumne* tale revera existeret, atque si existere comprobaretur, necne ei aliquid *hydrogenii* inesse possit, ONUPHRIUS DAVIUS Eques primo dubitavit; rem autem experimenta nupera VAUQUELINI ultra dubium posuisse videntur †. Modo supradicto *acidum* sine dubio conficitur, eique aliquid praeter *chlorinum* et *oxygenium* subesse nulla causa credendi apparuit. *Chlorinum* igitur et *oxygenium* coëuntia *acidum chloricum* constituunt, ex quo, cum *alcalibus*, *terrīs oxydisque* metallorum sociato, *hyperoxymuriata* nascuntur.

Praeter *acidum chloricum oxygenii* et *chlorini*

* Thomson's Annals of Phil. V, 128.

† Annales de Chimie, LXXV, 91.

composita duo alia ONUPHRIUS DAVIUS Eques invenit, quorum in utroque, quam in *acido chlorico*, *oxygenium* parcius continetur. Horum compositorum alterum, in quo *chlorinum* cum minima copia *oxygenii* sociatur, ab *hyperoxymuriate potassae* in *acido muriatico* diluto calefacto obtinuit, idemque *euchlorinum* nominavit; alterum eidem sali ope *acidi sulphurici* subduxit, et sine ullo nomine *chemicis* patefecit. Neutrum eorum vires *acidas* ostendit; *chlorini* igitur *oxyda* habenda sunt.

SECTIO SECUNDA.

DE EXPERIMENTIS AD HAS LITES DIRIMENDAS
INSTITUTIS.

OPINIONES duas jam nunc expositas recte intelligenti, *phaenomena* fere omnia, quae *acida muriaticum* et *oxymuriaticum* ostendere solent,

per utramque explicari posse, ideoque nullam inter eas dijudicandi potestatem dare, monstrare foret supervacaneum. Primo forte aspectu, experimentis, quibus BERTHOLLETUS ex *acido oxymuriatico*, in aqua soluto, et soli objecto, se *oxygenium* abstraxisse putavit, huic *acido oxygenium* revera inesse comprobari videatur; satis autem est in aperto, haec nequaquam alterutri opinioni favere: *oxygenium* enim vel ab *acido oxymuriatico*, *acido muriatico* in aqua soluto relicto, vel ab aqua, illius dum *hydrogenium chlorino* adjunctum *acidum muriaticum* format, oriri credatur. Experimenta quoque omnia a LUSSACO et THENARDO instituta, etiamsi eos tunc temporis impulerunt, qui affirmant *gas muriaticum* aquae copiam sui ponderis quadranti aequalem continere, pariter, id quod hi ipsi confitentur *chemici*, opinioni *Davianae* conveniunt. Omissis igitur his omnibus, ad rem propositam nihil pertinentibus, illa solummodo experimenta, quae una harum opinionum facile illustrat, altera autem obcoecat, nunc exquiramus.

Quae his de causis primo notatu digna videntur, labores sunt MURRAII percelebris, qui, inter eum et JOANNEM DAVIUM controversia acerrima de constitutione *acidorum muriatici* et *oxymuriatici* exorta, seriem experimentorum narravit, et ea tanta vi atque solertia sustinuit, ut cura nonnulla perscrutanda sint, ne momentum eorum pluris justo aestimetur. Si vel *acido oxymuriatico oxygenium* inesse, vel *gas muriaticum* aquam modo supradicto continere, probatum sit, *hypothesin* Gallicam stabilitam habendam esse clarissime constat. Harum propositionum alterutra, experimentis, quorum nulla alia ratio reddi potest, comprobata, ex ea *hypotheses* partes sequuntur caeterae omnes. Earum igitur ad utramque MURRAIUS animum ordine adhibuit.

Acidi oxymuriatici naturam dum ONUPHRIUS DAVIUS Eques exploraret, in eo, forma aëria donato, *carbonium*, ope caloris antea penitus exsiccatum, eo calefecit, ut incandesceret; nullam autem, vel in *acido*, vel in *carbonio* mutationem notavit. De hoc experimento infra disceptan-

dum erit; nunc dicere sat est ab eo MURRAIUM *carbonii acido oxymuriatico* modo quodam alio objiciendi consilium cepisse. Illi in mentem venerunt experimenta, quibus CRUICKSHANCKIUS *gasa acidum oxymuriaticum* et *hydrogenium carburatum* subjecit, atque ex iis rei instanti lucem nonnullam effulsuram esse speravit. His experimentis notum est, *gasa acidum oxymuriaticum* et *hydrogenium carburatum* inter sese mista, in *acida muriaticum* et *carbonicum* verti: vel cito, si per ea fulmen *electricum* trajiciatur, vel tardius, si aliquot horas *gasa* simul mista requiescant. Hic *oxygenii* partem, quod *acidum oxymuriaticum* praebet, atque *hydrogenium* ab *hydrogenio carburato* evolutum, coëuntia, aquam constituere, quam *acidum muriaticum* statim corripit, MURRAIUS credit; *oxygenii* dum reliqua *carbonium* in *acidum carbonicum* vertit: experimenti autem rationem, nisi *acido oxymuriatico oxygenium* subesse credatur, haud patere posse affirmat*. Nequaquam autem

* Nicholson's Journal, XXVIII, 141.

explanatu difficile est, si tantum ad humorem, qui *gasibus* omnibus retinetur, animos advertamus. In experimento CRUICKSHANCKII, *gasibus* et *acido oxymuriatico* et *hydrogenio carburato* super aquam collectis, nullaue ad humorem *hygrometricum* abstrahendum adhibita cura, aqua, quam in iis adesse necesse est, *oxygenii* satis, quod cum *carbonio* consocietur, praeberet; ejusdem aquae dum *hydrogenium*, una cum *hydrogenio* antea *carbonio* in connubio, *chlorino* adjunctum, *acidum muriaticum* conficeret.

Quanquam autem, hac de causa, ab experimento CRUICKSHANCKII nihil deducitur, illud tamen, cum *gasibus* exsiccatis, et *gasibus hydrogenio oxydoque carbonico gasis hydrogenii carburati* in locum suppositis, iterari admodum fuit optandum; ut neque ab aqua *hygrometrica* praesente, neque *gasum*, quibus *hydrogenii carburati* nomen *chemici* imposuerunt, a natura varia atque incerta error vel dubium oriretur. *Gasum* igitur *hydrogenii* atque *oxydi carbonici*, moles aequales et *acidi oxymuriatici* aërii duas cum semisse (utroque gase antea penitus ex-

siccato,) MURRAIUS invicem miscuit, mistasque sub luce seposuit. Horis viginti quatuor elapsis, *acidi oxymuriatici* color viridis evanuerat; aqua admissa, amplitudinem ad dimidiam compositum statim sese contraxit, propter *acidum muriaticum* ab aqua correptum: et *gas* reliquum per aquam calcis trajectum eam dealbavit, ideoque sibi *acidum* inesse *carbonicum* monstravit*.

In hoc experimento JOANNES DAVIUS *oxygenium* ab aqua obtineri posse existimans, aquae in locum *ammoniam* aëriam supposuit, et, hoc mutato, *acidum carbonicum* nullum confici dixit. MURRAIUS autem, experimento sic mutato iterum exacto, *oxydum carbonicum* in *acidum* veriti adhuc affirmavit: et JOANNES DAVIUS, postquam rem altius exploraverit, errorem suum confessus, salem *ammoniatum* his in experimentis genitum, *acido nitrico* diluto adjecto, effervesce, *acido carbonico* scilicet evoluto, concessit. Haec res tamen, quamvis comprobeatur, neutri de natura *acidi oxymuriatici* opinio-

* Nicholson's Journal, XXVIII, 144.

ni objici potest: *experimenti* enim ratio patescit, sive *acidum oxymuriaticum* inter simplicia ponatur, sive ex *oxygenio acidoque muriatico* constitui credatur.

Quanquam et LUSSACUS atque THENARDUS, etiamque MURRAIUS, *gasa acidum oxymuriaticum oxydumque carbonicum* nullam inter se exercere *affinitatem* asseverarunt, experimentis suis JOANNES DAVIUS rem longe aliter se habere, monstravit. Cum *gasa acidum oxymuriaticum oxydumque carbonicum*, penitus exsiccata et commixta, aut radiis directis solis aut luci reverberatae objiciuntur, *gasis acidi oxymuriatici* colorem viridem evanescere, amplitudinem ad dimidiam misturam sese contrahere, et *gas* relictum proprietatibus nec *acidi oxymuriatici* nec *oxydi carbonici*, sed omnino suis gaudere, reperit. Has proprietates nunc enarrare proposito nostro prorsus esset alienum; substantiam hanc novam, quam JOANNES DAVIUS *phosgenium* nominavit, *acidorum* in ordinem accipiendam esse, scire sufficiat. Aqua si commistum est, et *phosgenium* et aqua in elementa propria solvuntur,

hydrogenio aquae et chlorino phosgenii ad acidum muriaticum gignendum coëuntibus, dum oxydum carbonicum oxygenium aquae accipiens in acidum carbonicum abit. Ammoniae adjectum phosgenium salem medium constituit, a quo ammoniam acidum nitricum dilutum rursus solvit, phosgenio ab aqua acidum diluti modo jam dicto in acida muriaticum et carbonicum resolutum *.

His cognitis, experimenta MURRAII, et cum aqua et cum ammonia, modo opinioni Davianae consentaneo, facile explicantur. In utroque experimento, gasa acidum oxymuriaticum oxydumque carbonicum coëuntia gas phosgenium constituerunt, quod, oxygenio ab aqua accepto, acidum carbonicum praebuit. Dici quidem potest, quamvis gasa acidum oxymuriaticum et oxydum carbonicum commista, radiisque solis objecta coëant, et phosgenium conficiant, hanc eandem substantiam pari ratione ex gasibus acido oxymuriatico, oxydo carbonico atque hydrogenio gignendam esse, haud necessario sequi.

* Phil. Trans. 1812, 144:

Necne *chlorinum* ab *hydrogenio* quam ab *oxydo carbonico* vehementius attractum, *acidum muriaticum* potius quam *phosgenium* gignet, nonnulli fortasse rogitent. Etiam hanc tamen dubitandi causam JOANNES DAVIUS experimentis suis prorsus abstulit; tribus enim his *gasibus* commistis et luci oblatis, *chlorinum* inter *hydrogenium* et *oxydum carbonicum* aequaliter partitum, et *gas muriaticum* et *phosgenium* genuisse reperit*.

Haec igitur experimenta, a MURRAIO *acido oxymuriatico oxygenium* inesse ad comprobandum prolata, rationi *Davianae* nihil repugnant: illum nunc *gas muriaticum* explorantem, eoque aquam abstrahere conantem, sequamur.

Gas quamvis *muriaticum* in aquam *acidumque* purum resolvere *chemici* saepissime tentaverint, id moliri semper frustra nixi sunt. Nulla ab eo aqua abstrahi potest, nisi *oxydum* aliquod praebeatur, cui *acidum muriaticum* adjunctum *urias* constituat, a quo ope caloris aqua obtineatur. Ex talibus tamen experimentis nihil

* Phil. Trans. 1812, 150.

sequi satis est in aprico ; dijudicari enim nequit, seu aqua ab *acido muriatico* aliud in connubium abeunte tantum relinquitur, seu illam *oxygenium oxydi* cum *hydrogenio acidi muriatici* sociatum format. Corpus autem si ullum est, cui *acidum muriaticum* se adjungat, cuique nihil *oxygenii* inesse cognoscitur, huic corpori *gas muriaticum* offerendo, numque ex his coëuntibus humor ullus deponatur statuendo, an *gas muriaticum acidum* sit purum, an ex *acido* atque aqua constituatur, patebit. Sola *ammonia* his gaudet proprietatibus, cum qua igitur MURRAIUS experimentum excogitavit, quo tandem sententiam suam vel probare vel refellere, omnemque de *acidis muriatico* et *oxymuriatico* dubitationem tollere, speraverit.

Si *gas muriaticum ammoniae* aëriae penitus modo solito exsiccatae adjectum, praeter *ammoniae murias* dat quoque aliquid aquae, sententia Gallica comprobata habenda est: hujus enim aquae fons est nullus, nisi *gas muriaticum* eam praeberere credatur. Si autem, e contrario, aqua nulla appareat, nullam *gasi muriatico* in-

esse, et humorem illum, qui ex *oxydo acidoque muriatico* aërio coëuntibus obtineri solet, ex *oxygenio oxydi* et *hydrogenio acidi muriatici* conjunctis nasci, credendum est. Hoc igitur pro experimento crucis MURRAIUS proposuit.

Experimentum primus MURRAIUS ipse tentavit, et *ammoniae muriate*, quod obtinuit a vase, in quo *gasa* consociata erant in aliud translato, eique calore modico adhibito, aquam vasis in parte superiore densatam esse affirmavit *. Experimentum dein iteravit ONUPHRIUS DAVIUS Eques, qui *muriate ammoniae* in eodem quo genitum fuit vase calefacto, et aëre circumfluo penitus excluso, nullam aquam obtinuit †. Eodem exitu sic mutatum repetitum fuit a JOANNE DAVIO, qui cum *urias ammoniae* prius aëri exposuit, quam ei calorem adhibuit, se revera aquam obtinuisse superdixit ‡. MURRAIUS tunc experimentum suum iterum exegit, aëre circumfluo jam penitus excluso, ne exinde humor ullus praeberetur, atque e sale

* Nicholson's Journal, XXXI, 127.

† Ibid. 314.

‡ Ibid.

sic calefacto aquam expulsam esse adhuc asseveravit *. BOSTOCKIUS quoque et TRAILIUS, quorum uterque hoc experimentum suscepit, se aquam obtinuisse dixerunt, etiamsi *urias ammoniae* nunquam a vase, in quo genitum fuit, abstulerant; *gasum* autem quantitibus adeo exiguis hi usi sunt, ut eorum experimenta omnino negligenda sint †. Denique, *chemico anonymo* factum fuit experimentum, qui, *Davium* dicta firmans, nihil aquae apparuisse asseruit ‡.

His de affirmatis, inter se omnino discrepantibus, haud operae pretium fuerit disputare; ex talibus enim nihil concludere fas est. Quum *chemici* tantum rerum causas reddentes inter se dissentiant, aliquid forte disputando proficiatur; quum autem de rebus ipsis ambagitur, experimentis, haud verbis, opus est.

Dum lites ita sese haberent, ONUPHRIUS DAVIUS Eques forte Edinburgum pervenit, ejusque loci *chemicorum* in conspectu hoc expe-

* Nicholson's Journal, XXXII, 189.

† Ibid. 18.

‡ Ibid. XXXI, 236.

rimentum iterari voluit. Factum igitur fuit collegii in *officina chemica*, Professoribus HOPPIO et PLAYFAIRIO, GEORGIO MACKENZIE, ONUPHRIO DAVIO, Equitibus, et JOANNE DAVIO praesentibus. *Ammoniam* aëriam et *gas acidum* muriaticum, diligenter parata atque exsiccata, *retortam* in amplam gradatim et vicissim indiderunt, donec utriusque pollices nonaginta cubici coierant. *Murias ammoniae* modo solito confectum primo per vas totum internum fuit sparsum; calore autem modico adjuvante, sal omnis *retortae* in fundum sese levavit. Collum nunc vacuum ad aquam accipiendam relictum, pannis aqua gelida madefactis fuit refrigeratum; fundo dum calor admotus fuit, donec sal attolli, et se *retortae* ad incurvationem ostendere coepisset. Ignis nunc fuit subductus, collumque *retortae* inspectum, dum fundus adhuc erat calidissimus, et ea pars, ad quam *muriatis ammoniae* pauxillum se levaverat, aquae bullientis calorem exsuperabat. Narrantis ecce ipsissima verba, “ *A dew just perceptible was observed lining the cold neck.*”

Aquae globuli hunc rorem constituentes adeo erant exigui, ut vix oculo, nisi *microscopio* interposito, percipi potuerint *.

Quo, quantum aquae hoc experimento apparuerat accurate cognosceretur, HOPIUS aquae guttam unicam, grahum pendere existimatam, *retortae* illi, in qua factum fuit experimentum, omnino simili indidit, eique ut antea ignem subjecit. Aquae vasis in collo densatae illa, quam prius notaverat, saltem triplo plus esse putavit; ideoque pondus aquae in experimento confectae grani trientem haud exsuperare posse judicavit.

Huic experimento publice prolato MURRAIUS objiciens, praecipue *retortae*, qua usi fuerant, propter amplitudinem, id aliquantulum mutatum iterum, chemicis inspicientibus, fieri optavit. HOPIUS igitur rogatus experimentum suscepit, idque coram MURRAIO, ELLISIO nobilique viro SEYMORIO perfecit. *Gasum acidi et alcalini* moles eadem, quae in experimento Daviano, in *retorta* parva fuerunt omni cura

conjunctae, salique sic genito calore adhibito, aqua ut antea vasis in collo reperta fuit. Hanc aquam fuisse majorem, quam in experimento priori, HOPPIUS non dubitavit, ejusque pondus ad cognoscendum via eadem, qua antea, usus, aquam hoc in experimento observatam grani trientium duorum aestimavit *. Denique, HOPPIUS et MURRAIUS postea experimentum saepius iteraverunt, cum copiis *gasum* triplo quadruploque majoribus, et nunquam humorem jam dicto copiosorem observarunt †.

Aquam igitur ex *ammonia* aëria et *gase acido muriatico* coëuntibus obtineri nemo nunc inficias ibit; quidnam autem abhinc sequitur? Sententiam Gallicam nequaquam his experimentis comprobata esse satis est in aperto; huic enim *hypothesi* si credatur, *gasis muriatici* pollices nonaginta cubici aquae grana octo praeberent, grani autem tantum trientem vel trientes duos revera dederunt; et in experimentis ultimis copia eadem perexigua humoris

* Nicholson's Journal, XXXIV, 266.

† Audit. Praelect. Hopii.

apparuit, etiamsi pollices trecenti vel quadringenti cubici utriusque *gasis* consociarentur. Dici quidem potest, aquam reliquam *ammoniae* cum *muriate* sociatam mansisse, neque hujusce salis propter naturam volatilem, calore ullo, qui haud *urias* in vaporem tolleret, disjungi potuisse. Hoc autem ad sententiam Gallicam firmandam manifeste nihil confert; eam his experimentis nil obsistentibus adhuc veram esse posse solummodo monstrat. Nisi aqua ad *gas muriaticum* pertinere existimata in *muriate ammoniae* revera adfuisse comprobetur, experimenta jam enarrata huic opinioni nihil favent; humoris enim perminuti, qui his in experimentis apparuit, ratio sat facile reddi potest, etiamsi *gas muriaticum* aquae copiam sui ponderis quadranti aequalem continere negetur. *Gasibus* omnibus, modo solito paratis atque collectis, aquam nonnullam, quae humor *hygrometricus* appellatur, inesse, nunc bene norunt *chemici*. Talibus equidem *gasibus* aquae aliquid abstrahi potest, si corporibus eam valide sibi attrahentibus objiciantur; hoc autem mo-

do totam, quae iis continetur, aquam, sejungi posse nequaquam compertum est. E contrario, quoniam, quo aqua partim abstrahitur, eo vis qui reliquam in connubio retinet augetur, *gasa* nunquam humoris omnino expertia fieri posse clarissime constat. Si autem *gasibus* omnibus aquae pauxillum semper adsit, hic humor *gase acido muriatico* et *ammonia aëria* quam aliis, vi majori retinebitur; haec enim experimentis HENRII aliorumque in aquam *affinitatem* mire validam exercere noscuntur. *Gasa* denique jam dicta fons haud sunt unicus, unde aqua praeberetur: vasis quoque et *hydrargyro*, quorum ope *gasa* collecta erant atque consociata, quamvis omni cura exsiccatis, aquae pauxillulum adhaereret. Nemini certe haec omnia rite pendenti humoris his in experimentis notati rationem reddere difficile videatur; *gasum* potius ex pollicibus tot cubicis copiam majorem aquae haud confectam fuisse mirabitur.

MURRAIUM igitur in utroque conatu sententiam suam nequaquam comprobasse ex supra-

dictis patere videtur. A *gasibus acido oxymuriatico*, *oxydo carbonico* et *hydrogenio* inter semistis *acidum carbonicum* nunquam obtinuit, donec prius aquam adjecerit; et *gas muriaticum* et *ammonia* aëria coëuntia aquam nullam dederunt; nisi quae in his *gasibus* separatis forma humoris *hygrometrici* adfuisse facillime credatur. His experimentis jam perpensis, ad ea proxime animus adhibendus est, quae ad propriam de his rebus sententiam explorandam ONUPHRIUS DAVIUS Eques excogitavit.

Carbonium, humoris omnino expers, in *acido oxymuriatico* aërio eo ut incandesceret calefactum, nullam subire mutationem, antea memoratum fuit *. Hoc experimentum ONUPHRIUS DAVIUS Eques opinioni Gallicae objecit; si enim *acidum oxymuriaticum* ex *oxygenio acidoque muriatico* constituatur, cur *carbonium*, a quo *oxygenium* validissime attrahitur, *oxygenium* ab *acido muriatico*, cum quo *affinitate* debiliori sociatur, non disjungat? Huic tamen MURRAIUS respondit, experimentumque suae opi-

* Phil. Trans. 1810, 232.

nioni convenienter explicavit. *Acidum muriaticum* forma aëria indutum sine aqua existere haud posse si concedatur, quando *carbonium* in *gase oxymuriatico* calefactum est, neque *acidum* neque *carbonicum* ullo modo mutari posse manifeste patet. Quamvis enim *carbonium* *oxygenium* attraheret, et cum eo sociaretur, fons est nullus, unde aqua, sine qua *gas muriaticum* formari nequit, praeberetur. Hujusce aquae igitur propter defectum, *acidum muriaticum* in formam aëriam transire non potest, ideoque neque *acidum oxymuriaticum* in elementa resolvitur, neque *carbonio oxygenium* praebetur. MURRAIUS tamen non solum hanc experimenti interpretationem tradidit, sed praeterea eam opinionibus *Davianis* minime consentaneam esse affirmavit ; si enim *acidum oxymuriaticum* principium *aciditatis* proprium est, *oxygenio* simile, ei similiter inflammabilia attrahens, iisque coëns, quare cum *carbonio* pariter ac caeteris non sociari potest ?

Hic primo notari debet, inter *chlorinum* et *carbonium* nullam *affinitatem* existere nondum

comprobatum fuisse. *Carbonium chlorino* aërio simpliciter oblatum, ut in experimentis *Davianis*, intactum manere nemo dubitat; multa tamen sunt corpora, qua sic conjungi nequeunt, quaeque nihilosecius aliis modis facillime consociantur. Corpora nonnulla, ut *hydrogenium* et *nitrogenium*, conjungi non possunt, nisi ita ut nascens nascenti occurrat, conciantur; alia, ut *corundum* et *acida*, coïre negant, nisi eorum vis cohaerendi prius solvatur; etiamque alia, ut *oxygenium* et *nitrogenium*, partim conjuncta connubium ineunt, quod aliter vix ac ne vix quidem effici potest. *Acidi muriatici* resolutionem *chemicos* opinionem Gallicam tuentes tandem effecisse, ejusque *basin* ex *oxygenio* corporibusque aliis omnino disjunctam obtinuisse, paulisper fingamus. Corpus si hoc novum *oxygenio* esset oblatum, ut *chlorino* in experimentis *Davianis* fuit *carbonium*, ea nequaquam coïre posse illius *hypotheseos* ex principiis manifeste patet; aqua enim, sine qua *gas muriaticum* formam aëriam induere nequit, abesset. Hinc autem *oxyge-*

nium in *basin acidii muriatici affinitatem* nullam exercere, ideoque principium *aciditatis* haud nominandum esse, nequaquam certe sequeretur. Nonne causa aliqua, his fortasse similis, inter *chlorinum* atque *carbonium* connubio obstat, qua sublata, ut in exemplis jam traditis, facile coëant?

Praeterea *chlorinum* et *carbonium* revera sese mutuo attrahere, ab experimentis antea citatis fere compertum esse videtur. Si *acidum carbonicum* et *oxydum carbonicum* existere *chemici* adhuc ignorarent, et si attamen *acida* plantarum ex *carbonio*, *oxygenio* et *hydrogenio* constitui reperissent, an hinc *oxygenium* in *carbonium* nullam *affinitatem* exercere concluderent? Inter haec duo corpora *affinitatem* revera existere nonne potius judicarent? Pari ratione, etiamsi corpus ex *chlorino* et *carbonio* unicis compositum *chemici* nondum repererint; quoniam in *phosgenio* supradicto *carbonium* cum pauxillo *oxygenii* et multo *chlorini* sociatum ostenditur, *carbonium* a *chlorino* attrahi cur dubitari possit?

Etiam si denique comprobetur, *affinitatem* inter *chlorinum* et *carbonium* deesse, ea res opinioni *Davianaë* non repugnare videtur. Quum primum *chemici* principii *aciditatis oxygenio* titulum imposuerunt, *acida* nulla in elementa resolverant, in quibus non *oxygenium* repereant, ideoque *acida* sine *oxygenio* adjuvante haud fieri posse crediderunt. Hanc autem sententiam falsam nunc norunt *chemici*; *acida* enim esse nonnulla, quibus nihil *oxygenii* inest, nemo jam dubitat. Sulphur *hydrogenio* adjunctum *acidum* format: *hydrogenio tellurium* sociatum gignit aliud *, *acidumque prussicum* ex *hydrogenio*, *carbonio* et *nitrogenio* constitui jam cognoscitur †. Quoniam igitur, sine *oxygenio* *acida* nasci reperiuntur, principia *aciditatis* alia praeter *oxygenium* existere necesse est; et si principium *aciditatis* scientiae *chemicae* inter voces proprias adhuc conservandum est, elementorum, quae in utroque horum *acidorum* inveniuntur, haec appellatio vel uni vel

* Phil. Trans. 1810, 30.

† Thomson's Annals of Phil. v, 454.

alii necessario imponenda est. Quanquam autem vel *hydrogenium*, vel *sulphur*, vel *nitrogenium* principium *aciditatis* nominetur, nequaquam certe abhinc sequitur, ut haec elementa corporibus aliis adeo late ut *oxygenium* connubium inirent. Elementorum omnium, *acida* gignendi facultate quae pollent, *oxygenium* certe *acida* plurima constituit; quoniam autem praeter *oxygenium* etiam sunt alia, quibus multo pauciora nascuntur, *chlorinum*, quia ex eo corporibus nonnullis adjuncto *acida* fiunt, cum elementis omnibus coïre minime expectandum est.

Acido oxymuriatico aërio in vas exhaustum, cui *stannum* calefactum infuit, admisso, et *acidum* et *metallum* prorsus evanuisse, et substantiam, quam nomine *liquoris Libavii chemici* bene norunt, eorum in loco repertam fuisse, ONUPHRIUS DAVIUS Eques est auctor. Hanc substantiam ex *acido muriatico stannique oxydo* opinionem Gallicam tuentes constare credunt, ei itaque *ammonia* addita *ammoniac murias* et *stanni oxydum* daret. *Liquoris igitur Libavii*

pauXillo ONUPHRIUS DAVIUS Eques super *hydrargyrum ammoniam* aëriam adjecit: multo calore fuit absorpta, et *gas* nullum apparuit. In vase corpus solidum subalbidum repertum fuit, cujus nonnihil, annon ei *stanni oxydum* inesset, ut cognosceretur, calefactum fuit: totum autem in fumum crassum naribus acrem sublatum abiit. Tentamen alterum omni cura perfectum, in quo *ammonia* nimia addita fuit, *Libavii liquorem* ab *ammonia* in elementa resolvi non posse, cum ea autem compositum formare ultra dubium comprobavit. In utroque tentamine humor diligenter fuit exclusus; aqua autem admissa, *ammonia liquori Libavii* adjecta, et *urias ammoniae* et *oxydum stanni* facillime praebuit*.

Hujus experimenti secundum *hypothesin Davianam* ratio nullo negotio reddatur. Nullum *oxydum stanni* ope *ammoniae* a *liquore Libavii* obtineri potuit, quia huic substantiae nihil *oxygenii* inest; aqua autem adjecta, *hydrogenium chlorino* et *oxygenium stanno* ad acidum

* Phil. Trans. 1810, 232.

muriaticum et *oxydum stanni* gignenda praebuit, quorum *acidum muriaticum* cum *ammonia* se sociavit, *oxydum stanni* sejunctum relinquens. *Chemici* contra, qui sententiam Gallicam amplectuntur, corpus subalbidum hoc in experimento confectum, salem esse triplicem ex *acido muriatico*, *oxydo stanni* et *ammonia* constitutum, autumant: et ab eo *oxydum stanni* ope caloris separatum obtineri non posse dicunt; quia propter naturam volatilem salis hujusce triplicis, totus calore etiam modico in vaporem tollitur. Hac autem interpretatione *phaenomena* omnia experimenti nequaquam explicari videntur. *Acidum muriaticum* in *ammoniam* *affinitatem* certe validam exercet; id autem jam *stanni oxydo* satiatum *ammoniam* magna vi corripere, eique cum emissionem multi caloris adjungi, minime quidem expectandum fuit. Hoc tamen sententiae alteri non repugnat; *liquor enim Libavii* corpus est e *chlorino* et *stanno* compositum, cujus de *affinitate* in *ammoniam* nihil a priori judicari potest. Opinioni praeterea Gallicae si credatur, effectus aquae hoc

in experimento admissae interpretatione care-
re videtur. Salem triplicem jam dictum in
oxydum stanni et *urias ammoniae* aqua resol-
vit, et hoc ad explicandum *acidi muriatici affi-*
nitatis mirabilis in aquam nihil valet: *acidum*
enim *muriaticum* in hoc experimento nunquam
corporibus aliis disjunctum existere, sed tan-
tum *oxydum stanni* relinquens ad *ammoniam*
transire, existimatur. Cur hic transitus, nisi
aqua adsit, fieri non potest, causa prorsus la-
tet. Pari modo, quare *liquori Libavii*, cui
aquae guttae paucae adjectae sint, *ammonia*
addita salem triplicem non format, sed ipsa
cum *acido muriatico* sociatur, *oxydo stanni* de-
misso, nihil rationis dici potest. Haec tamen
ratione *Daviana* clarissime explicantur; aqua
enim, secundum illam, prorsus est necessaria,
ut *oxygenium stanno* et *hydrogenium chlorino*
suppeditentur.

Gasi acido oxymuriatico ONUPHRIUS DAVIUS
Eques deinde *phosphorum*, pariter ac *stannum*,
et modo simili, objecit. Hoc in experimento
composita duo, unum solidum, alterum flui-

dum, obtinuit ; quorum, si opinioni Gallicae credamus, illud ex *acidis muriatico* et *phosphoroso*, hoc *acidis muriatico* et *phosphorico*, constituitur. *Phosphori* autem si *acida* hisce compositis revera insunt, eā sejuncta obtinere, et sic *acido oxymuriatico oxygenium* inesse comprobare nequaquam difficile fore ONUPHRIUS DAVIUS Eques censuit. Compositi igitur solidi sat parato, id in excipulo *ammonia* aëria impleto calefaciens *ammonia* saturavit ; pulveremque album opacum obtinuit. Haec substantia *ammoniae* e *muriate* et *phosphate* constare necesse est ; quoniam autem *ammoniae murias* facillime in vaporem tollitur, et *ammoniam* ab *acido phosphorico* calor infra excandescentiam disjungit, haec substantia calefacta *acidum phosphoricum* praeberet. Hujus itaque pulveris nonnihil in tubo vitreo, a quo aëra circumfluum penitus exclusit, ONUPHRIUS DAVIUS Eques calefecit, neque donec excanduerat ignem subduxit : pulvis autem sub tanto calore omnino fixus mansit, et neque *gas* emisit, neque ullam mutationem subiit. Experimentum tunc aqua

admissa iteravit, et *ammonia* adjecta, atque calore adhibito, *acidum phosphoricum* jam facile obtinuit *.

Hoc in experimento ex *chlorino* et *phosphoro* coëuntibus compositum novum constitui ONUPHRIUS DAVIUS Eques credit; a quo manifeste nihil *acidi phosphorici* obtineri potest: aqua autem admissa, *phosphorus oxygenium* et *chlorinum hydrogenium* accipiunt, atque in *acida phosphoricum* et *muriaticum* vertuntur. His tunc *ammonia* adjecta *urias* et *phosphas ammoniae* format, et *urias ammoniae* una cum *ammonia phosphatis* calore expulsum *acidum phosphoricum* liberum relinquit. Chemici, ex altera parte, qui contrariam sententiam amplectuntur, experimenti rationem hoc modo reddunt. Neque *acidum muriaticum*, neque *phosphoricum*, sine aqua existere posse, dicunt; neutrum enim ab *alcalibus*, *terris oxydisve* metallorum, nisi aqua adsit, disjungi potest. Quando igitur in experimento *acidum oxymuriaticum* *phosphoro oxygenium* praebet, et sic

acida muriaticum et *phosphoricum* gignuntur, quoniam iis nihil aquae praebetur, *acida* separata manere nequeunt, sed statim necessario in connubium ruunt. Ex his coëuntibus *acidum compositum* nascitur, quod cum *ammonia* sociatum salem sui generis constituit. Aqua autem admissa, et *acidum muriaticum* et *phosphoricum* valide sibi attrahens, illa a coëundo prohibet; iisque igitur *ammonia* nunc addita, non salem jam dictum, sed *ammoniae murias* atque *phosphas* format.

De his duabus interpretationibus vix opus est, ut disseram. Quam facile sententia *Daviana* experimenti rationem reddit, quantumque id ad explicandum *hypothesis* altera laborat, primo intuitu clarissime patet. Sales quosdam triplices ex duabus *basibus* atque uno *acido* compositos *chemici* norunt; nullos autem ex una *basi* duobus *acidis* adjuncta constantes unquam reppererunt. Illi equidem, qui opinionem Gallicam amplectuntur, *phosgenium* JOANNIS DAVII ex *acidis muriatico* et *carbonico* prorsus siccis et *chemice* conjunctis componi

asserentes, id cum *ammonia* sociatum salem hujusce generis ostendere autumant. Quoniam autem *phosgenii* ipsius, pariter ac substantiae, ex *chlorino* et *phosphoro* coëuntibus confectae, natura est disputata, hoc pro exemplo perhiberi haud posse satis constat ; nisi his *chemicis phosgenium* revera ex *acidis muriatico* et *carbonico*, et non, ut alii existimant, ex *oxydo carbonico* et *chlorino* constitui, prius comprobetur. Compositum *ammoniae* et *acidi fluoboracici* hi *chemici* etiam citant : sed hoc quoque exemplum, manifeste nil valet, natura enim *acidi fluoboracici* ac *phosgenii* pariter est incerta, atque ab eadem lite pendet. Si *acidum fluoboracicum* ex *acidis fluorico* et *boracico* componi *chemici* omnes crediderint, tunc compositum supradictum sal ex una *basi* et duobus *acidis* constitutus sine dubio foret ; multi tamen his assentiri nolentes, *acidum fluoboracicum* ex *boro* et *fluorino* constari dicunt, ideoque *fluoboras ammoniae* aliis salibus *ammoniatis* quod ad constitutionem prorsus esse consimile autumant.

ONUPHRIUS DAVIUS Eques denique, et compo-

situm liquidum ex *chlorino* et *phosphoro* coëuntibus confectum, *liquoremque muriaticum sulphuratum* THOMSONI, quem *chlorinum* cum *sulphure* sociatum format, *ammonia* exsiccata saturavit; *ammoniae* autem *urias* nullum ab utro obtinuit. Composita nova, ut in aliis tentaminibus, exorta sunt, ex quibus corpus nullum, cui *oxygenium* infuit, obtineri potuit. Haec experimenta nullam disquisitionem poscere videntur. Per utramque *hypothesin*, modo prorsus simili ac experimentum jam enarratum, explicantur; ideoque pariter cum eo sententiae *Davianaë* favent.

SECTIO TERTIA.

DE ANALOGIIS UTRIQUE OPINIONI FAVENTIBUS.

QUAM mira facilitate ab utraque *hypothesi* ratio *phaenomenorum* duci potest ex supradic-

dictis certe liquidissime patet. Quoniam propter hanc causam, experimentum, quo vel una vel altera sententia refellatur, *chemici* nondum excogitarunt, lites vel injudicatae linquendae sunt, vel ratiocinandi modus alius tentandus. Ad *analogiam* igitur proxime curae adhibendae sunt, qua duce inter duas *hypotheses* dijudicando nonnihil forsitan proficiamus.

Acidi muriatici de constitutione nihil prorsus certum ab experimentis disci posse antea dictum fuit; quia id in elementa resolvere frustra *chemici* tentaverant. Annon illius dotes proprietatibus corporum aliorum, quorum elementa experimento fuerunt explorata, comparando, aliqua similitudo pateat, quae in hac re ad opinionem saltem verisimilem ducat, nunc exquiramus.

Secundum doctrinam *Lavoisierianam*, dotum, quae *acidis* propriae sunt, *oxygenium* fons est; ideoque principium *aciditatis* nominatur. Ex hoc principio, corpori alicui, quod *basin* appellavit, adjuncto, *acida* omnia componi perhibuit. *Acidis* equidem ex quibusdam *oxygenium* obti-

nere non potuit. Haec autem caeteris similiter constitui non dubitavit, eorum etiamsi elementa adeo arcte inter se consociarentur, ut nunquam adhuc invicem disjungi potuissent. Inter haec *acida* fuit *muriaticum*, quod, his de causis, ex *oxygenio* atque corpore aliquo ignoto constare *chemici* omnes crediderunt.

Disputandi ordinem, quo hanc ad opinionem perventum fuit, tunc temporis mire verisimilem visum fuisse nemini certe dubitari potest. *Acidorum* aliorum proprietatibus omnibus *acidum muriaticum* gaudebat, et cum corporibus aliis sociatum composita omnino similia prae-buit. De hoc igitur pro comperto habere, quod de illis experimentum ipsum comprobaverat, ratiocinandi modus videbatur; cui nemo, nisi nodum in scirpo quaerens, objiceret. *Chemia* tamen jam aucta doctrinam *Lavoisierianam* de *aciditate* non modo non firmavit, verum etiam multa, quibus penitus est subversa, in lucem protulit. *Oxygenium acidis* omnibus haud contineri jam satis apud *chemicos* compertum est; atque nunc ne quidem dici potest id ulla alia

natura *acidis* pluribus inesse, *hydrogenium* enim quam *oxygenium* in *acidis* haud paucioribus reperitur. *Acidis* omnibus plantarum prae-
ter *carbonium* atque *oxygenium* nonnihil *hydro-*
genii inest ; *acidis muriatico*, *hydriodico*, et *flu-*
rico hydrogenium sine dubio continetur, iis au-
tem *oxygenium* inesse nullus comprobavit ; *hy-*
drogenium sulphuratum et *hydrogenium tellura-*
tum ex *hydrogenio*, *sulphuri* et *tellurio* adjuncto
componuntur ; atque *carbonium*, *hydrogenium*
et *nitrogenium* inter se consociata acidum *prus-*
sicum constituunt.

Quoniam igitur *acida* jam in elementa reso-
luta adeo varie constituuntur, nullis legibus
adhuc a *chemicis* exploratis *acida* convenienter
nasci, satis patet. *Chemicus* igitur corpus quod-
libet proprietatibus gaudere, propter quas *aci-*
dorum in ordinem accipiendum fuit, tantum
certior factus, nullam de elementis, ex qui-
bus componeretur, sententiam daret. *Acidum*
quamvis *muriaticum acidis* aliis prorsus est con-
simile, an illud e substantia simplici *oxygenio*
adjuncta, an e tali substantia cum *hydrogenio*

sociata constat, hac a similitudine judicari nequit.

De experimentis, quae *chemici gas muriaticum* aquae copiam sui ponderis quadranti aequalem continere credentes, ad sententiam suam comprobendam instituerunt, antea deceptatum fuit; an *gas muriaticum* corporum aliorum ullam fert similitudinem, quae huic opinioni vel faveat vel obstet, jam explorandum est.

Chemicos apud omnes *gasibus* omnibus humorem *hygrometricum* qui appellatur inesse nunc constat, qui per testimonia varia existere probetur, quique ope substantiarum aquam valide sibi attrahentium aliquatenus abstrahi potest. *Gas muriaticum* gasa pariter ac alia humoris nonnihil *hygrometrici* continet; HENRIUS enim a *gase muriatico* recens parato, quam ab eodem *muriatici calcis* sicco prius exposito, plus *hydrogenii*, ope fulminis *electrici*, obtinuit; et ONUPHRIUS DAVIUS Eques *gas muriaticum*, frigori vehementi objectum, *acidi muriatici* liquidi

pauxillum deponere reperit *. *Gas* itaque *muriaticum*, ac *gasa acida*, *sulphurosum*, *oxymuriaticum*, *carbonicum*, *hydrosulphuricum* atque alia, quod ad aquam attinet, *phaenomena* eadem ostendit; his igitur *gasibus*, praeter humorem *hygrometricum*, nihil aquae inesse si credatur, ad eandem de *gase muriatico* sententiam habendam *analogia* manifeste urget. *Chemici* ideo Gallici sententiam suam de hoc *acido* primum concipientes, *gas muriaticum acidum* fuisse purum corporibus aliis omnino disjunctum nunquam dubitarunt, neque ei quam *gasibus* aliis plus aquae inesse credendi causam ullam viderunt. Illi tamen, qui nunc opinionem Gallicam amplectuntur, *gasis muriatici* omni etiam cura exsiccati quadrantem esse aquam autumant, et hanc rem *analogiae* haud repugnare affirmant, quia *acida* alia, ut *sulphuricum*, *phosphoricum* et *nitricum*, ab *alcalibus*, *terris oxydisque* metallorum disjuncta, cum multa aqua sociata semper inveniuntur. Haec autem exempla ab illo de quo disputatur prorsus discrepare satis

* Nicholson's Journal, XXXIV, 71.

patet, quia *acida* jam dicta cum hac aqua sociata formam non induunt aëriam. In calore solito nostri aëris quaedam *acida* aëria existere possunt, quaedam non : inter haec sunt *acida sulphuricum, phosphoricum et nitricum* ; inter illa est *acidum muriaticum*. *Acida*, quae interdum *gasa* fiunt, a forma liquida ad aëriam transeuntia, aquam, in qua antea soluta erant, *humore hygrometrico* excepto, semper totam relinquunt ; itaque, si *acidum muriaticum* in hoc transitu aquae copiam sui ponderis quadranti aequalem secum tollit, *phaenomenon* ostendit, cui nihil consimile *chemici* unquam adhuc observarunt.

Si, his rebus nil obsistentibus, *gas muriaticum* tantum aqua revera continere concedatur, tunc *phaenomenorum*, quae *muriata* ostendunt, ab *hypothesi* Gallica ratio et facilis et simplex duci potest. *Acidum muriaticum alcalibus, terris oxydisque metallorum adjunctum, muriata* format, e quibus prorsus exsiccatis, nihil *acidi muriatici* ope caloris conficitur, quia *acidum muriaticum* corporibus aliis disjunctum existere ne-

quit ; aqua autem praebita, *acidum muriaticum basin* relinquens se huic aquae ad *gas muriaticum* constituendum adjungit. Haec tamen *phaenomena* nec tam facile nec simpliciter ratio *Daviana* explicare videtur. Quoniam in *acido muriatico* cum iisdem *phaenomenis* ac in *acidis* aliis metalla solvuntur, *acidum muriaticum* horum metallorum cum *oxydis* sociari posse, ad credendum cogimur. *Muriata* autem ad expulsionem humoris finitam calefacta, proprietatibus ac composita ex metallis et *chlorino* prorsus iisdem gaudent. ONUPHRIUS DAVIUS Eques igitur dixit *oxygenium oxydi* et *hydrogenium acidi muriatici* invicem coeuntia aquam constituisse, quam calor expulit, *chlorino* atque *metallo* unicis in connubio relictis ; et quando huic composito aqua adjecta est, partem illius in elementa resolvere censuit, ut *hydrogenium chlorino* et *oxygenium metallo* restituerentur. Nullam equidem praeter hanc interpretationem suis opinionibus consentaneam daret ; ea autem nequaquam lucida, aut rebus ipsis consentanea videtur. Aquae revera in elementa resolutae, et horum

elementorum iterum ad aquam constituendam coëuntium, aliquid indicii animus appetit ; *chemici* enim non adhuc aquae elementa tam facile invicem conjungi et dissociari reppererunt. Praeterea, cum *urias potassae*, sal medius ex *acido* atque *alkali* constans, in compositum *chlorini* et *metalli* hoc modo transit ; vel cum hoc compositum iterum in *urias* convertitur, proprietates quoque harum substantiarum aliquatenus mutari expectaretur. Res tamen non ita sese habet. *Potassae urias* verum a calore admoto haud majorem quam alii sales mutationem subit, atque aqua iterum adjecta iis similiter in formam pristinam revertit. Corpus igitur ex *chlorino* et *potassio* constans, atque alterum ex *acido muriatico* et *potassa* compositum, haud magis, quam sal siccus ob eodem humido, inter se quod ad proprietates discrepant. De *muriatis* omnibus aliis eadem dici possunt. Huic a *chemicis* doctrinam *Davianam* sequentibus respondebitur, quod *muriatis* in compositum *chlorini* et *metalli* calore admoto conversi an proprietates revera mutantur necne, statui non po-

test, quia compositi novi proprietates tentari nequeunt, donec id in aqua solvitur, ideoque iterum in *urias* convertitur. Hoc tamen illius, quod objicitur, vim non aufert; nam hoc compositum atque *urias* verum sunt adeo consimilia, aut potius omnino eadem, ut quo tempore corpus quodvis *chlorini* et *metalli* esse compositum cessat, atque *urias* fit, cognosci nequeat.

Sententia duplex de constitutione *acidi oxymuriatici* et experimenta ei *oxygenium* inesse ad comprobandum instituta antea fuerunt exposita: cui opinioni *analogia* favet nunc exquiramus.

Gas acidum oxymuriaticum inflammationem sustinendi facultate pollet; corpora enim multa in illud projecta sponte inflammantur et ardent. Hanc vim ab *oxygenio acidum oxymuriaticum* constituyente pendere *chemici* omnes antea crediderunt; flammam enim, nisi ab *oxygenio* cum inflammabilibus coëunte, orientem nunquam observaverant; et nonnullis talia *phaenomena* huic de constitutione *acidi oxymuriatici* opi-

nioni favere etiam nunc forte videantur. Cuique tamen his rebus animum admoventi cito patebit, exempla etiamsi essent nulla corporum sine *oxygenio* praesenti ardentium, hinc *acido oxymuriatico oxygenium* contineri haud fas esse concludere. Corpora inflammabilia quoniam sunt permulta, multa quoque fore quibus inflammatio sustineatur, veritati nequaquam est absimile. Nunc equidem satis apud *chemicos* compertum est, corpora alia praeter *oxygenium* tali modo in connubium ruere, ut ex iis coëuntibus et lux et calor eliciantur. *Sulphur cupro, ferro, zinco, stanno, potassio vel sodio* adjunctum, aëre externo penitus excluso, et lucem et calorem emittit; et *phosphorus potassio vel sodio* coëns eadem *phaenomena* ostendit *. In *acido* igitur *oxymuriatico* aërio, quamvis corpora quaedam flammam concipiant, ei *oxygenium* inesse nequaquam abhinc sequitur. E contrario, quaedam jam comperta fuerunt, quibus id, facultate quadam sibi propria, et non ab *oxyge-*

* Davy's Elem. of Chem. 528.

nio pendent, inflammationem sustinere, monstrari videtur.

Si *gas acidum oxymuriaticum*, solum quia ei *oxygenium* inest, flammam sustineret, *oxygenio* aucto, hanc quoque vim augeri oportet. In *euchlorino* autem, secundum rationem Gallicam, *acidum muriaticum* multo majori copiae *oxygenii* adjungi existimatur, quam in *acido oxymuriatico* ; in illo quoque *oxygenium* in statu densato existit, pariter ac in *acido oxymuriatico* ; et denique in *euchlorino*, *oxygenium*, propter copiam suam auctam, vi minori, quam in *acido oxymuriatico*, retineri necesse est. Ab *euchlorino* igitur, flammam melius quam ab *acido oxymuriatico* sustineri prorsus expectandum est. Res tamen longe aliter se habet : metalla omnia in *gase acido oxymuriatico* sponte sua ardentia in *euchlorino*, nisi calor adhibeatur, immutata et intacta manent. Calore equidem admoto flamma sequitur ; hoc autem haud accidit, nisi calor ad *euchlorinum* in *gasa acidum oxymuriaticum* atque *oxygenium* resolvendum sufficiat ; quo facto, ut in his *gasibus* invicem

mistis metalla accenduntur. *Chemici* autem, qui opinionem Gallicam sequuntur, cur *euchlorinum oxygenium* ad flammam sustinendam non daret, dum id ab *acido oxymuriatico*, cui parcius inest, tam facile praebetur, etiamsi se causam ostendere non posse confiteantur, hanc rem tamen suis opinionibus haud tantum repugnare; quantum primo forte intuitu videatur, affirmant, quia exemplum unum aliud huic consimile reppererunt. In *oxydo nitroso* corpora accensa ardent; sed in *oxydo nitrico*, quod copiam majorem *oxygenii* habet, flamma extinguitur.

Si *acidum oxymuriaticum* ex *oxygenio* atque *acido muriatico* constitui credatur, *acidi muriatici basis* ignota corpus simplex, quod nunquam nisi *oxygenio* adjunctum invenitur, perhibenda est. *Oxygenii* copiae minimae *acidum muriaticum*, majusculae *acidum oxymuriaticum*, majori *euchlorinum*, adhuc majori *oxydum* alterum *chlorini*, et maximae *acidum chloricum* adjunctum constituit. Composita haec omnia *acida* appellanda esse satis est in aperto; *acidum* enim

muriaticum, cui *oxygenii* copia minima inest, omnibus *acidorum* viribus gradu insigni pollet. Hanc tamen doctrinam haud veritati esse similem minime sane negandum est ; nullum enim, *chemiae* scientia tota, plurium *acidis* duobus ex *oxygenio* eidem *basi* adjuncto nascentium exemplum praebet. Corpora equidem nonnulla cum *oxygenio* sociata composita plura efformant, horum autem compositorum duo solummodo *oxygenii* abundantissima sunt *acida* ; caetera, neque propter dotes nec constitutionem hoc nomine digna, *oxyda* nominantur. Haec tamen *hypothesis* longius adhuc a verisimilitudine abesse videbitur, si ad proprietates substantiarum, quas ex *oxygenio* et *basi* ignota *acidi muriatici* compositas depingit, animus adhibeatur.

Quando *oxygenium* *basi* cuivis adjunctum uno *acida* plura constituit, haec *acida*, pro ratione quantitatis *oxygenii* quod iis continetur, vires *acidas* validiores vel debiliores nunquam non ostendunt. *Acidum*, verbi gratia, *sulphuricum sulphuroso* fortius est, quia illi quam huic

oxygenium copiosius inest; et pari ratione, *phosphoroso phosphoricum*, *nitroso nitricum* sunt validiora. Huic legi quod non paret *acidum* nullum est. *Acidum* ergo *muriaticum*, *acidum oxy-muriaticum*, *euchlorinum*, *oxydum* alterum *chlorini* atque *acidum chloricum* ordine, quo jam enumerabantur, vires *acidas* magis magisque potentes exercere oportet; quam longe autem hoc a vero abest vix opus est ut dicam. *Acida muriaticum* et *chloricum* sola viribus *acidorum* gaudent, etiamque eorum vires *acidæ* inter se se comparatae nequaquam cum lege supradicta concordant. *Acidum muriaticum*, quod omnium compositorum *oxygenii* copiam minimam habet, *acidum* est fortius quam *chloricum*, cui *oxygenium* est copiosissimum. Composita tria alia *aciditate* prorsus carent. *Euchlorinum* equidem, quod ad actionem ejus in colores plantarum attinet, paululum *acidum* simile dicitur. Ab eo, uti a *chlorino*, colores plantarum penitus delentur, caeruleus autem evanescens leni rubore tinctus apparet. Hanc igitur dotem *acidis* propriam quodammodo ostendit, sed, hæc

de causa, loco inter *acida* nequaquam dignum esse videtur, quia omnibus aliis proprietatibus *acidorum* omnino est expers. Neque habet saporem acidum, neque cum ullo *alcali*, aut *terra*, aut *oxydo* metalli sociari potest.

Chemici, qui opinionem Gallicam amplectuntur, quantum haec omnia suae sententiae obstant videntes, exempla alia hisce consimilia multa cura inter *acida* quaesiverunt; frustra autem, nullum *acidum* enim exemplum his ullo pacto comparandum praebet. Ab *alcalibus* tamen quaedam supradictis quodammodo similia *phaenomena* nasci hi iidem affirmant, quibus rite perpensis, horum corporum proprietates rationi Gallicae eorum constitutionis haud adeo repugnare videntur. *Potassium* et *sodium*, cum quadam quantitate *oxygenii* sociata, *potassam* et *sodam* formant; *oxygenii* autem copiae majori adjuncta, composita nullis dotibus *alcalinis* gaudentia constituunt. *Basis* ignota *acidi muriatici* ab *oxygenio* adjecto primum *aciditatem* adeptam fuit, dein amisit, et denique iterum recepit. In hoc igitur exemplo mutatio ex

aliqua parte similis efficitur; metallum enim, *oxygenio* accepto, *alkali* fit, copia autem *oxygenii* aucta *alkalinitatem* amittit.

Haec tamen illius, quod objicitur, nequaquam vim auferunt; duo enim exempla non inter se consimilia esse videntur. Hi *chemici* respondentes manifeste pro concesso sibi assumpserunt, *oxygenium* causam esse sive rem genetricem et *aciditatis* et *alkalinitatis*; haec autem est *hypothesis* admodum dubia, quae nec comprobata fuit, nec probari potest. Quando *acida* duo ex *oxygenio*, eidem *basi* adjuncto, nascuntur, illud, cui *oxygenii* copia maxima inest, *affinitates* validiores quam alterum semper exercet. Huic legi, a nulla *hypothesi* pendenti, sed observationibus omnibus ultra dubium stabilitae, credere necesse est, seu *oxygenium* causam esse *aciditatis* concedatur, seu non; ideoque *acida* omnia, quae reperiuntur, hac lege astringi expectantur. In *alkalibus* lex talis nequaquam reperitur; e contrario, ex *alkalibus* tribus cognitis, uni *oxygenii* nihil omnino inest, et nullum est exemplum *alkalinitatis* ab *oxygenio* addito auc-

tae. Etiam si igitur *potassii* et *sodii peroxyda* vires *alcalinas* non ostendant, quoniam hoc nulli legi est contrarium, exemplo disputato, quod legi firmatae repugnat, comparari nequit.

Si *chlorini* et substantiarum, quas id *oxygenio* et *hydrogenio* adjunctum constituit, proprietates ita sententiae *Davianaë* faveant; vis earum ad hanc opinionem firmandam auctior fiet, si *iodini* ejusque compositorum dotes quoque contemplemur.

Iodinum est corpus nuper Galliae *chemicis* inventum, quod miris modis *acido oxymuriatico* consimile est. *Acida* duo omnino discreta, *oxygenio* unum, *hydrogenio*que alterum, adjunctum format; quorum illud *acidum iodicum*, hoc *hydriodicum* nominatur. Horum tamen *phaenomenorum*, aliorumque omnium, quae haec substantia corporibus aliis coëns ostendit, prout *iodinum* corpus simplex vel compositum perhibeatur, ratio duplex reddi potest. Si ratio Gallica de *acido oxymuriatico* anteferatur, idque ex *oxygenio* *acido*que *muriatico* constitui credatur, *iodinum* ex *oxygenio* atque *acido hydriodico* constare pari

ratione perhibendum est. Hanc secundum sententiam *acidi hydriodici basis* ignota, ut *acidi basis muriatici*, corpus est simplex, quod nunquam adhuc ab *oxygenio* disjunctum fuit, cum eo autem sociatum composita complura gignit.

Haec *phaenomena* opinioni *Davianaë* haud parum favere satis patet, et quia, praeter exemplum jam a *chlorino* ejusque compositis praebitum, aliud rationi Gallicae pariter repugnans ostendunt, et quia haec duo exempla adeo inter sese sunt consimilia. Corpora haec eadem sententiae *Davianaë* convenienter ordinata nunc lustremus.

Si *chlorinum* elementorum in ordinem accipiat, una cum *iodino* atque *sulphure* ponendum est; et hisce corporibus simillimum esse reperietur.

Horum trium ab utroque *phaenomena* inflammationis interdum nascuntur: quando enim cum substantiis quibusdam aliis, *oxygenio* penitus excluso, sociantur, et lux et calor emittuntur. In *chlorino* corpora plurima ardere diu apud *chemicos* compertum fuit; e *sulphure* atque *cupro*,

ferro, zinco, stanno, potassio vel sodio coëuntibus, lucem et calorem evolvi, satis etiam norunt; et ab iodino se cum potassio vel phosphoro sociante eadem phaenomena nasci experimenta nupera Lussaciana monstraverunt.

Chlorinum, iodinum et sulphur, quod ad actionem eorum in colores plantarum attinet, etiam inter se mira similitudine sociantur. A chlorino hos colores penitus deleri satis apud omnes cognoscitur; et iodino vim prorsus eandem, etiamsi debiliorem, inesse, chemici omnes inter se consentientes dicunt. Acida etiam ex chlorino atque iodino cum oxygenio sociatis orientia eadem facultate pollent. In chlorino igitur vis delendi colores est fortissima, in iodino fit debilior, et in sulphure fere prorsus evanescit. Sulphur ipsum in colores mutandos nil valet; neque equidem in aqua solvitur, neque formam aëriam induendi est potens, ideoque ad colores plantarum, ut chlorinum vel iodinum, admoveri nequit. Sulphur autem, oxygenii pauxillo accepto, acidum sulphurosum fit, cui colores expositi non, uti ab aliis acidis admotis, rubescunt, sed, quasi ab

acidis ex oxygenio atque chlorino vel iodino inter se consociatis nascentibus, penitus delentur.

Haec tria corpora, cum principiis aquae dum sociantur, consimilitudinem inter sese adhuc conservant; utrumque enim *acida* duo, cum *hydrogenio* unum, cumque *oxygenio* alterum, sociatum praebet. *Chlorinum hydrogenio acidum muriaticum*, et *oxygenio chloricum*, *iodinum hydrogenio acidum hydriodicum*, et *oxygenio iodicum*, atque *sulphur hydrogenio acidum hydro-sulphuricum* vel *hydrogenium sulphuratum*, et *oxygenio acidum sulphuricum*, adjuncta gignunt. Haec *acida* ita constitui LUSSACUS notavit, ut quo illa, quibus *hydrogenium* inest, arctius, eo illa, quibus *oxygenium* continetur, elementa sua laxius invicem consociata habent; aut, ut alias loquar, quo vel *chlorinum* vel *iodinum* vel *sulphur* in *hydrogenium* *affinitatem* validiorem, eo in *oxygenium* debiliorem exercet. *Sulphur* igitur ab *iodino*, *iodinumque* a *chlorino*, *oxygenium* abripiunt; ex altera autem parte, *chlorinum* ab *iodino*, *iodinumque* a *sulphure*, *hydrogenium* auferunt. Haec *acida* denique vires

acidæ magis magisque potentes pro ratione vis harum *affinitatum* ostendunt. Quoniam *chlorinum*, *iodinum* atque *sulphur* ordine, quo nunc enumerabantur, *hydrogenium* attrahunt, ex tribus *acidis*, quæ ex iis atque *hydrogenio* coëuntibus nascuntur, *muriatricum* est fortissimum, et *hydrosulphuricum* est debilissimum; et quoniam hæc corpora *oxygenium* ordine contrario attrahunt, *sulphuricum* est *acidum* potentissimum, dum *acidum chloricum* *affinitates* debiles exercet. Hinc quoque, quodcunque horum trium corporum *hydrogenio* adjunctum *acidum* debile constituit, idem *oxygenio* nuptum *acidum* dat potentissimum. *Acidum* ergo *hydrosulphuricum* est perdebile, sed *sulphuricum* vires validissimas ostendit; *acidum* contra *muriatricum* est potentissimum, dum *chloricum* *affinitates* parum validas exercet; et denique *iodinum*, quod locum habet medium inter *chlorinum* atque *sulphur*, seu *hydrogenio* seu *oxygenio* adjunctum, *acidum* viribus mediis pollens constituit.

Euchlorinum et *oxydum* alterum *chlorini* nul-

las vires *acidas* ostendere, huic rationi non repugnat, sed prorsus convenit. *Chlorini* et *oxygenii* sunt composita, quorum neutri sat *oxygenii* ad *acidum* constituendum inest; *oxydis* igitur *nitroso* atque *nitrico* comparari possunt.

Quamvis *chlorinum* *iodino* atque *sulphuri* unicis adhuc comparatum fuerit, nequaquam tamen his solis est simile. *Nitrogenium* quoque et *oxygenio* et *hydrogenio* connubium init, et corpora hinc nascentia, atque composita supradicta inter se sunt consimilia. *Nitrogenium* *oxygenii* cum parvis quibusdam quantitatibus sociatum, *oxyda nitrosum* et *nitricum*, *oxydis chlorini* jam dictis similia, praebet; *oxygenio* aucto, *acidum nitrosum sulphuroso* comparandum nascitur; et *oxygenii* copiae maximae adjunctum, *acidum nitricum* constituit, quod *acida chloricum* et *iodicum* similat, non solum quia hisce similiter facillime in elementa resolvitur, verum etiam quia mensura una *nitrogenii* cum mensuris duabus et semisse *oxygenii* *acidum* ad *nitricum* constituendum jungitur, itidem ac mensura una *chlorini* vel *iodini* cum mensuris

duabus et semisse *oxygenii* ad *acida chloricum* vel *iodicum* formanda sociatur. *Nitrogenium* denique *hydrogenio* et aliquantulo *carbonii* adjunctum *acidum prussicum*, *muriatico* et *hydriodico* quod ad constitutionem haud absimile, praebet.

Similitudines quamvis pauciores inter *chlorinum* et *carbonium* et *phosphorum* et corpora quaedam alia facillime monstrari possent, hanc rem autem ulterius prosequi supervacaneum foret. *Chlorinum* nulla similitudine cum ullo corpore cui *oxygenium* inest, sociari, sed elementis illis, inter quae ab *hypothesi Daviana* ponitur, esse simillimum, ex supradictis satis patet.

De *phaenomenis*, quae ex *acido oxymuriatico* atque corporibus aliis coëuntibus nascuntur, nunc dissereretur; de iis tamen, experimenta *Daviana* inter enarranda, adeo fuse antea disputatum fuit, ut hanc rem rursus aggredi vix opus esse videtur. Horum *phaenomenorum* rationem per doctrinam *Davianam* facile et simpliciter reddi, eorum autem interpreta-

tiones non solum minus simplices, verum etiam imperfectas, ab altera sententia tradi, ex rebus tunc prolatis manifeste apparuit. *Phaenomena* tamen adhuc sunt perpauca haud antea enarrata ; quae tamen non ideo notatu indigna videntur.

Si per mensuras aequales *gasis acidi oxymuriatici* et *gasis hydrogenii*, penitus exsiccatas et invicem commistas, fulmen *electricum* trajiciatur, fragor fit, et *gas muriaticum gasibus* usurpatis magnitudine aequale conficitur. Hoc in experimento *acidum muriaticum per synthesis* nasci ONUPHRIUS DAVIUS Eques credit ; *chemici* autem, qui opinionem Gallicam amplectuntur, *hydrogenium* usurpatum *oxygenio acidi oxymuriatici* adjunctum aquam, statim ab *acido muriatico* in formam aëriam transeunte corripiendam, constituere existimant. Hoc saltem in exemplo *hypothesis Daviana*, quam altera, interpretationem certe simpliciore praebet. *Gasa hydrogenium* et *chlorinum* evanescunt, et *gas muriaticum* eorum in loco reperitur : hoc igitur ex illis coëuntibus nasci dicere explica-

tio est, qua nil simplicius concipi potest. Hujus autem experimenti *phaenomena*, ut HOPPIUS in suis praelectionibus notavit, opinioni Gallicae, non *Davianae*, nihilosecius favere videntur. Corpora fere omnia *chemice* coëuntia densantur, vel in spatium minus, quam antea, sese contrahunt; hoc autem in experimento *gasum chlorini* et *hydrogenii*, priusquam exploduntur, ac *gasis muriatici*, quod ex iis invicem consociatis conficitur, moles est eadem. Haec praeterea res sententiae Gallicae nil repugnat; secundum hanc enim, quo *oxygenium* et *hydrogenium* aquam formantia densari creduntur, eo *acidum muriaticum* a connubio cum *oxygenio* exiens sese expandere existimatur.

Hoc tamen opinioni *Davianae* vix objiciendum videtur; quia in scientia *chemica* exempla alia substantiarum, mole earum non densata, *chemice* coëuntium, nequaquam desunt. Sales non pauci cum aqua solutiones praebent, quarum densitas haud mediam inter densitatem salis atque aquae exsuperat; *potassium sodio*,

et *aurum cupro*, *ferro* vel *stanno*, adjuncta, composita suis elementis non solum non densiora, imo vero rariora constituunt; et *gasis oxydi nitrici* elementa, etiamsi inter se *chemice* conjuncta, in statu haud densato existunt; hujus enim *gasis* mensurae duae in *nitrogenium* et *oxygenium* resolutae mensuram tantum unam utriusque praebent. Adhuc equidem dici potest haec omnia corpora per *affinitates* debiles conjungi; dum *hydrogenium*, apud ONUPHRIUM DAVIUM Equitem, *chlorinum* valide sibi attrahere existimatur. Quoniam autem densatio nexum *chemicum* non semper comitatur, et quoniam, quando corporum inter coëundum densatio revera fit, incrementum densitatis rationem vis *affinitatis*, qua ea inter se consociantur, nequaquam sequitur; corpora et per *affinitates* debiles et per validiores sine densatione invicem conjungi, manifeste nihilo adhuc de his rebus patefacto est contrarium.

Si *gasa chlorinum* atque *iodinum* simul misceantur, ea facile coïre, atque ex iis inter se conjunctis *acidum* novum sui generis nasci

LUSSACUS monstravit. Secundum opinionem Gallicam, et *chlorinum* et *iodinum* substantiae cujusdam ignotae atque *oxygenii* sunt composita, neutri quorum *oxygenium* ulla aciditatis signa impertit; haec tamen composita invicem consociata corpus viribus omnibus acidorum pollens constituunt. Quantum hoc analogiae repugnat, primo intuitu satis patet; nullum exemplum, cui hoc comparari potest, in tota *chemia* reperitur. Doctrina autem *Daviana* accepta, angustiae evanescunt; *chlorinum* et *iodinum* elementa sunt, ex utroque quorum *acida* nonnulla oriuntur, ex his igitur coëuntibus *acidum* nasci prorsus expectandum est.

Haec igitur sunt omnia de hac lite ab *analogia* nascentia, quae mihi ad animum cucurrerunt: priusquam tamen ad exitum perveniamur, de quibusdam a Professore BERZELIO et ab HENDERSONO contra opinionem *Davianam* prolati breviter disserendum est.

BERZELIUS sententiam *Davianam*, rationemque *Daltonianam* inter se conciliari non posse, quaedam ad probandum protulit. *Hypotheses*

hujusce perpulchrae, quae jamdudum auctorem suum tam insigniter illustravit, et *chemiam* ad locum adeo praeclarum inter scientias cito pro vectura videtur, principia explicare, utcunque breviter, proposito nostro prorsus esset alienum. A *chemicis* viam, quam DALTONUS monstravit, sequentibus, leges quasdam, quibus corpora inter coëundum obediunt, cognitae esse scire sufficiat. Harum legum unam de aqua salium chrystallis propria BERZELIUS patefecit, multisque firmavit experimentis. Quando sali cuilibet aqua inest, semper esse tantam affirmat, ut ejus *oxygenium oxygenio*, quod in *bas* salis continetur, aut sit aequale, aut illius sit numero ab integro *multiplex* vel *submultiplex*. *Ferri*, exempli gratia, atque *cupri subsulphata* ita constituuntur, ut aquae eorum chrystallis propriae tantum *oxygenii* inest, quantum in *oxydis bases* salium formantibus continetur. Huic legi *submurias cupri* subjiciendo, inter eam atque opinionem *Davianam* se discrepantiam reperisse, propter quam alterutra parum credenda est, BERZELIUS censet.

Cupri muriati alcali causticum adjectum, *oxydum* ne omne praecipitetur cura adhibita, *praecipitatum* demittit, quod diligenter elotum et exsiccatum *cupri* est *submurias*. Hoc sale in *acido nitrico* soluto, *acidoque muriatico* ope *nitratis argenti* praecipitato, tantum *muriatis argenti* conficitur, quantum partes 12.1 *acidi muriatici* partibus 100 *submuriatis cupri* subesse monstrat. Liquor super *hydrargyrum* digestus, ut *argentum* superfluum amoveatur, in *crucibulo platini* vaporatione siccatus, atque, donec et *hydrargyrus* et *acidum* avolaverint, calori rubro expositus, partes 72 *oxydi cupri* praebet. Ex 100 partibus igitur *submuriatis cupri* basis et *acidum* partes 84.1 formant. Partes 15.9 amissas esse aquam chrySTALLIS propriam necesse est. Sed partibus 72 *oxydi cupri* partes 14.37 *oxygenii* inesse, atque in partibus 15.9 aquae partes 14.32 *oxygenii* contineri compertum est; *cupri* ergo in *submuriate*, pariter ac in *subsulphate*, tantum *oxygenii* in aqua, quantum in *oxydo* continetur.

Haec autem dum corpora, eorum de consti-

tutione sententia Gallica habita, adeo apte inter se consentiunt, si opinionibus credatur *Davianis*, hunc consensum conservari posse *BERZELIUS* negat; nam secundum hanc doctrinam ab aqua chrySTALLIS propria, quae sali inest, partem quartam abstrahi, inque elementa resolvi necesse est, ut *cupro oxygenium* et *chlorino hydrogenium* praebeantur. Aqua igitur chrySTALLIS *submuriatis cupri* propria *oxygenium* quarta parte minus, quam *oxydo basin* salis constituenti inest, continebit. Haec autem ratio legi supradictae repugnat *.

Hanc tamen ratiocinationem ab opinionibus *Davianis* vix intellectis prorsus pendere, cuique his rebus animum admoventi cito patebit. Haec omnia neutri *hypothesi* favere possunt, quia corpus, quod *BERZELIUS* examini subjecit, haud e *cupro* et *chlorino*, sed ex *acido muriatico*, *oxydo cupri* et aqua constitutum fuit. In hoc composito *chlorinum hydrogenio* et *cuprum oxygenio* jam adjuncta fuerunt; aqua igitur chrySTALLIS propria resoluta, ut illi *hydrogenium at-*

* Thomson's Annals of Phil. ii, 257, and vi, 48.

que huic *oxygenium* praeberentur, nihil opus fuit. Si hic sal a *muriate* in *chlorini* et *cupri* compositum revera mutari fingatur, lege *Berzeliana* astringi manifeste nequit, ei enim neque aqua neque *oxygenium* tunc inessent.

His exploratis, nihil jam disserendum restat praeter res ab HENDERSONO prolatas *, quas tamen libellus noster, jam satis superque amplius, complecti non potest. Neque equidem hae disquisitionem longam postulare videntur, quoniam omnibus eadem objici possunt. In omni exemplo HENDERSONIS sine dubio *analyses* optimas, quas *chemici* adhuc tradiderunt, usurpavit. Propter has autem interdum deficientes, interdum manifeste inaccuratas, et saepissime de eadem re late inter se discrepantes, quodcunque ex iis computando colligitur, esse prorsus ambiguum et dubitandum necesse est. Auctor igitur ipse suis computationibus parum fidei propter has causas imponendum esse candidus agnovit; et cuique quidem eas perlegenti cito manifestum

* Thomson's Annals of Phil. ii. 15, et seq.

erit, tali ab indagatione quam aliquid vel certum vel fiducia dignum colligi possit, substantias in elementa resolvendi ad peritiam, quae hodie longe absunt, *chemicis* prius esse perveniendum.

DEDUCENDA.

EXPERIMENTIS omnibus a *chemicis* ad has lites dirimendas institutis, et *analogiis* utrique sententiae faventibus jam perpensis, inter duas *hypotheses* dijudicare nunc denique progrediendum est. Propositi nostri haec certissime pars est difficillima, atque mihi his rebus impetrato hic calamum abjicere, aliisque peritioribus haec perobscura statuenda relinquere, optimum fortasse foret. Quoniam autem nullus mortaliū res disputatas in scientia cognoscere et perscrutari, mentemque nullam ad opinionem proclivem tenere potest, in hac parte thema-

tis, quod mihi proposui, haerens animum equidem celarem, iudicium autem sustinere non possem. Omnia igitur utrique opinioni vel faventia vel obstantia, quam brevissime percurram, atque ex iis inter se comparatis, quatenus sit probabilior colligere aggrediar.

Res, quibus *hypothesis* Gallica praecipue nititur, sunt sequentes.

I. Quoniam *acidum muriaticum acida* alia, quae ex *oxygenio* cum variis elementis sociato constant, quod ad proprietates absolute refert, id quoque ex *oxygenio* et *basi* quadam, etiamsi ignota, constitui concluditur.

II. *Acidum muriaticum alcalibus, terris oxydis*que metallorum cum iisdem *phaenomenis* ac *acida* alia jungitur, et haec *phaenomena* in eodem modo simplici per opinionem Gallicam explicantur; sed secundum rationem *Davianam*, quando *acidum muriaticum* vel cum his *basibus* sociatur vel ab iis disjungitur, mutationes quaedam multiplices evenire existimantur, quas nulla alia *acida* ostendunt.

III. *Dotes muriatum* dotibus aliorum salium

compositorum sunt similes, ideoque cum sententia Gallica de constitutione *muriatum* prorsus consentiunt; sed nequaquam tales sunt, quales hisce corporibus inesse expectarentur, si, opinione altera accepta, ex *chlorino* et metallis constitui credantur.

Res quae, ex altera parte, rationi *Daviana* favent, hae sunt.

I. Quoniam *chemici acidum oxymuriaticum* in corpora alia seipso simpliciora resolvere adhuc semper frustra tentaverint, illud impraesentiarum inter elementa locare oportet.

II. *Acidum oxymuriaticum* nulla similitudine cum ulla classe substantiarum sociatur, quibus *oxygenium* continetur; sed elementa illa, inter quae ab *hypothesi Daviana* ponitur, arctissime refert.

III. *Phaenomena*, quae ab *acido oxymuriatico* et unaquaque substantiarum simplicium inter se coëuntibus nascuntur, per rationem *Davianam* facile et simpliciter explicantur; eorum autem interpretationes multiplices et mancas *hypothesis* altera tradit. Praecipue, si opi-

nioni *Daviana* credatur, dotes substantiarum ex *acido oxymuriatico* elementis aquae adjuncto orientium, dotibus aliorum corporum comparatae, ordinem perpulchrum ostendunt; dum, doctrina altera accepta, composita haec eadem proprietatibus suae constitutioni prorsus repugnantibus gaudent.

IV. *Iodium* inventum haec omnia admodum firmavit; illud enim *phaenomena* antea in *chlorino* observata et rationi Gallicae male faventia fere omnia iterum ostendit.

V. *Gasi muriatico* sicco aquae copiam quadranti illius ponderis aequalem semper inesse, opinionem sane creditu difficilem, ab hypothesis *Daviana*, ut ab altera non ad credendum cogimur.

Haec igitur sunt omnia, quae utrique sententiae vel faveant vel obstent. Mihi illa inter se comparanti rationi *Daviana* faventia maximi momenti videntur; haec ergo doctrina, me iudice, est alteri anteponenda.

ERRATA.

- Page 26. line 4. *pro qui lege quae*
— 28. — 5. *pro carbonicum lege carbonium*
— 39. — 20. *pro constari lege constare*
— 46. — 16. *pro aqua lege aquae*
— 71. — 12. *pro HENDERSONIS lege HENDERSONUS*



DISSERTATIO MEDICA

INAUGURALIS

DE

IMPERFECTA

SANGUINIS OXYDATIONE.

COR organum est, quo tempore embryo vivere incipit, ad longissimæ vitæ finem usque constanter movens ; et unicus totius corporis musculus, qui nullâ quiete fruitur, quâ vires amissas recreat. Cor solum semper agit, dormiendo æquè ac vigilando, perpetuo circuitu constringitur et dilatatur, et talia in corpus effecta habet, ut si punctum temporis ejus actio cessaret, ad incitas redigeremur. Vis nervosa enim sanguinis circulatione sustentatur, corque ipsum ex cerebro ad

munus continuandum pendet. Hæc duo systemata inter se vinculo arcto et indissolubili conjunguntur, in mutuis officiis fungendis, sibi invicem sunt adjumento, et quàmvis unicuique munus suis viribus innitens attribuere soliti sumus, attamen nexibus tam arctis conjunguntur, ut uni injuriam inferendo, alterum imminuimus et subvertimus. Cor cerebro actionis pabulum præbet, et invicem nervorum systema cordi vasisque vim vitalem aut agendi facultatem, idoneis stimulis applicatis, impertitur. Accipit cor sanguinem, qui actionem sustentat, et quibus partibus, ejus viribus opus est, distribuit.

Ad vitam autem sustinendam sanguine non solum opus est, sed etiam quoddam principium ei miscendum, quod accipit in organo ad noxia separandum, quæ, dum per circuitum iret, imberit, et ad novas vires sanguini tribuendas, quibus vitæ subsidium animalibus ferretur. Hæc organa pulmones sunt, qui per aëra has mutationes efficiunt, cujus parte præsentis ad sanguinem purificandum omnino opus est.

Hisce generalibus observationibus prædictis, cordis morbos in classes sequentes minimè perfec-

tas dividere possumus ; in medicinâ enim multis demonstrationibus opus est ad Pathologiæ corpus in medium afferendum, et hoc in nullâ medicinæ parte, magis quàm ad cor pertinente evenit.— Morbi ejus nec pauci nec simplices sunt ; nulla actio morbida in ullâ parte vivente excitari potest, quin cordis similem motum ex consensu induceret, nec ejus structuram aut munera depravare possumus, quin totum corpus simili morbo afficeretur. Nexus cordis cum corpore tam arctus, ut, quod unum perturbat, alterum simili dolore afficiat, perpetuum circuitum actionis et reactionis subeant, et corporis salus ex cordis sanitate pendeat.

Ad nervorum systema rite excitandum, ut jam dixi, necesse est, ut quædam sanguinis mutationes efficiantur : hoc fluidum enim, circuitu in corpore facto, arteriale seu utile principium amisit, et vires accepit, quæ, si in circuitu remaneant, actionem excitandi vice, validè reprimunt. Notandum igitur, venosum seu noxium principium à sanguine in circuitu per pulmones separari, et in eodem circuitu, novas vires ab aëris inspirati actione, et unius partis ejus cum sanguine conjunctione accipi. Sed si modum quo hæ mutationes

fiunt, et quo arterialis et venosus sanguis inter se discrepant, investigem, me à proposito nimiùm duceret, et in Physiologicâ et Chemicâ indagatione implicaret, de quibus quum dissertationes optimæ nuper scriptæ et excusæ sint, nihil novi suppedi-
tarem. Ad propositum satis duco, respirationis et sanguinis circuitûs munerum conjunctionem tam arctam memorasse, ut prioris morbos considerando, posterioris morbos investigare debeam. Quodcunque concordiam alterius perturbat, vel magis vel minùs alterum afficit, itaque cordis morbi nonnulli pulmonum læsionis, quàm cordis morborum symptomata magis definita, et vice versâ, sibi assumunt. Hæc sanguinis, nervorum, et pulmonum systematum conjunctio, cordis morbos in duas partes esse divisas clarè ostendit.— Classis prima includit cordis affectus, qui è cordis structurâ morbidâ, aut organo læso oriuntur, hosque veros, seu Idiopathicos morbos appellarem. Secunda classis omnes hujus organi affectus sympatheticos, aut morbos, qui è consensu cum aliis partibus dolentibus oriuntur, complectitur. Hi, ut à priore distinguantur, morbi Sympathetici cordis appellari possunt *.

Quànvīs omnes cordis morbi, sub has duas classes collocari possunt, ex hoc tamen paucos et simplices esse non sequitur. E contrario tractatu difficiles medico, symptomata sæpius malè definita sunt, et effecta ad corporis partem dijsunctam crebrò referunt. Hoc plerumque accidit in unâ morbidi cordis specie, ubi præcipua querimoniæ causa medico minimè accuratè inquirenti in abdomine posita esse videtur *.

Prima morborum cardiacorum vel idiopathicorum classis in duo genera dividi debet. Primum cordis status morbidos complectitur, qui in sanguinis qualitatem specialia effecta producunt. Secundum cordis status morbidos continet, qui in sanguinis circuitum penitus mechanicè agunt †.

Hujus distinctionis principium generale certè est accuratum, sed unumquodque genus describere, et diversas varietates separare, vix intra captum est. Unius enim varietates in alterius gradatim incurrunt, et amborum symptomata ita mista fiunt, ut morbus complicatus ex conjunctione oriatur.

* Vide FERRIAR in Inflammatione Chronicâ Cordis.

† ALLANI BURNS Prælectiones Audi.

Prioris generis morbi plerumque bene definiuntur, minimè verò tam accuratè, ut alii corporis affectus cum his confundi non possint. Ex defectu aut paucitate principii arterialis in sanguine pendunt, quo cognito, oportet nos causas investigare, quâ origine sanguis arterialie principium tam imperfectè accipiat. Ad hæc intelligenda, ad priorem observationem recurrendum est, nempe in pulmonibus sanguis plurimùm mutatur, principio noxio seu venoso privatur, cujus vice vires novas et salubres parat, systemate vivente in aëra inhalatum agente, hæ mutationes fiunt, et oxygenium corporis inopiæ subservit. Hoc facto observato, morbi diversarum specierum ad hoc genus pertinentium causas excitantes, in duas classes esse divisas, puto *.

Prima causarum classis cordi ipsi sine exceptione inhæret, et ex hoc organo in quibusdam partibus malè formato, constat, dum secunda classis per respirationis organa mechanicè obstructa agit, ita ut aëris quantum satis sit, admitti non possit.

* ALLANI BURNS Prælectiones Audi.

Quod ad causarum classem novissimam attinet, quodcunque cellas bronchiales obstruere tendit, secundùm causam operantem extensam, symptomata pathognomonica imperfectæ oxydationis producturum esse, observatu dignum est. Sic os tumidum subluridum in pulmonicâ anasarâ, et facies inflata et purpurea pneumoniam semper comitans, hinc originem ducunt. Hîc enim substantiâ parenchymatâ horum organorum tumefactâ, bronchiæ comprimuntur, aëris ingressus liber interrumpitur, sanguis à venosis viribus non omnino purificatur, phænomena admirabilia è principio arteriali exempto originem cepisse, et quæ morbi singularem naturam optimè signant, observare possumus. In alicujus partis inflammatione acutâ, intestinis exceptis, axioma sancitum est, arteriarum pulsationem duram et frequentiam aliquantò auctam, omnes systematis actiones, vigore multo majore, quam in salute esse patratas, et calorem magnopere esse adauctum. Sed hîc inquirendum, unde harum actionum auctarum pabulum acquiritur, et inventu erit facile, pulmones sanguini principia impertire, quibus hæc phænomena evocentur, et tamdiu sustententur. Certè tamen hæc organa hanc ob rem sana esse, *i. e.* aëris debitam quantitatem accipiendi

capacia, et etiam in aëra inhalatum agendo apta esse debent, aliter adesse nihil valet. Quæstio demùm hæc est. An pulmones inflammati, æquè ac sani, accipiendi et in aëra agendi capaces? Minimè vero statim respondebunt omnes. In hac inflammationis specie igitur nullas solitas notas, quibus aucta pulsatio dignoscitur, invenimus; è contrario tarda et mollis, superficiei calor non augetur, et vultus lividus, præterea magna anxietas in cordis regione, quæ omnia hoc organum, æquè ac pulmones, esse affecta indicant.

Hæc igitur cardiaci morbi symptomata obscura sine cordis ipsius statu verè morbido invenimus, et quodocunque thoracis capacitas, serosis aut purulentis fluidis effusis imminuitur, quibus, pulmonibus compressis, aëris inhalati amplitudo imminuitur, eadem symptomata eveniunt. Ex tumoribus in thorace sitis, idem orturum esse; quandoquidem impedimenta mechanica respirationis organorum motui libero præbent, et sanguinem debitâ principii arterialis quantitate orbant.

Hepatis aliorumque abdominis viscerum ampliatio, sanguinis principii vitalis paucitatis causæ indirectæ fient, et sæpe fiunt.

Quandocunque Hepar et Lien magnitudine augescunt, diaphragma sursum in thoracem premitur, pulmones comprimuntur, et, eodem modo quo tumores, aut fluida in thoracem effusa, pulmonibus oxygenium eripiunt, secundum aëra abductum, vires sanguinis diminuuntur. JOAN- NES et ALLANUS BURNS prælectores in hac ur- be, hepatis ampliati exemplum unum offende- runt, ubi hujus visceris margo obtusus ad quar- tam veram costam usque impulsus est, margo a- cutus productus, donec ilii spinam tetigit, organo- rum chylopoëticorum æquè ac respirationis mu- nera impediens. Alterum exemplum observa- runt, quo lien tam ampliatus fiebat, ut libras qua- tuordecim penderet, maximamque spirandi diffi- cultatem, et respirationis imperfectæ in sanguine effecta solita afferret.

Nec solidi tumores in abdomine, sanguinis circuitum solum impediunt, aquæ in ventris cavo collectæ idem efficient, itaque in ascitæ stadio ul- timo, vultum tumidum, labia cærulea, infra un- gues lividum, superficiem frigidam, et arteriarum pulsationem parvam et debilem invenimus.

His paucis de primâ causarum classe, quæ pri-

mo generi ordinis prioris morborum cardiacorum originem dant, observatis, ad causarum secundam classem considerandam pergo. Hæ causæ cordi ipsi inhærent, nempe, aliqua hujus organi mala formatio, quâ sanguinis pars à pulmonico in systemicum cordis latus, sine circuitu per pulmones facto, continuò transmittitur.

In hoc exemplo apud omnes constat, in sinistro seu systemico cordis latere, misturam sanguinis arterialis et venosi extitutum, et adulterati fluidi distributionem subsequentem in animalis corpore, idem effecturam, quàm si arterialis principii defectus ex aëris portione diminutâ à cellis bronchialibus ortus esset.

Talium malarum formationum, quæ sanguinis imperfectæ oxydationi originem dant, symptomata comitantia hæc sunt; anxietas et oppressio in thorace ab orthopnœâ, vellicationibus spasticis, et superficiei livore generali, in labiis et infra ungues præsertim manifesto, comitata. Hæc symptomata post intervalla abnormia redeuntia, vires exhauriunt et vexant, et postremò munerum torpor universalis et œdema generale his succedunt.

Hæc descriptio generalia et maximè prominen-

tia symptomata, quæ sanguinis imperfectam oxydationem comitantur, complectitur, sed tamen restat, ut horum symptomatum progressum indicem, et symptomatum rationem explicem.

Quum sanguis arterialis systemati maximi momenti et pretii sit, vitalis principii defectum omnem imo minimum, in sanguine majorem aut minorem depravationem actionum structuræ animalis inducturum, et specialibus et definitis effectibus distinctum iri, omnibus obviàm venit. Quandoquidem sanguinem viribus arterialibus privando, diversa organa debitam stimulationem accipere desinunt, cerebrum nervique muneribus suis imperfectè funguntur, torpor universalis systema pervadit; qui hoc morbo afficiuntur, potius germinare quàm vivere dici possint. Rarò enim aliud quàm vitam retinere possunt, repentinum nisum sustentando minimè apti sunt, vita lævis, æquabilis, et ullo arduo negotio exempta, sic etiam cum summâ curâ, sanguinei systematis specialis habitûs effecta citiùs aut diutiùs sentiunt. Nam quum sanguis venosus in cordis parte sinistra præ arteriali ponderat, quidam symptomatum ordo fluidorum in circuitu moventium statum nunc maximè morbidum signat. Ex hoc

sanguinis statu morbido effectorum series oritur, quæ aggregata, aliquam malam formationem mox describendam, suam causam esse agnoscunt. Enumeratione singulorum symptomatum structuræ morbidæ cordis præmissâ, in utrâque specie describendâ nihil nisi necëssaria repetemus. Nam ut cuncti morbidi status cordis, in hoc genere comprehensi, simili modo agunt, generalis effectorum in systemate conspectus tantùm postulatur.

Specialia effecta, quæ imperfectam oxydationem sanguinis distinguunt, incerto tempore post natum in lucem se proferre incipiunt. Ante partum cordis mala formatio nulla manifesta effecta proferunt, quum ante id tempus, pulmones in corporis muneribus nihil efficiunt, et etiam aliquamdiu postquam fœtus vivendi modum mutavit, phænomena ex imperfectâ vasculorum systematis formatione orientia, non omnibus apparent.—Nonnunquam puero jam nato, aliàs post nonnullos menses apparent, et in hujus morbi exemplo perfectissimo memorato, puer totum annum post partum, sine ullâ querimoniâ permansit.—Prima symptomata, quæ terrorem afferunt, morbi naturam clarè indicant, et in thoracis cavo vitium

aliquod declarant. Spiritus cum difficultate ducitur, corporis partes molli epidermide obductæ, colorem nativum amittunt, et lividum assumunt, dum membra et truncus plumbi coloris similitudinem habent. Puer simul à motu, qui symptomata aggerat, aversus, brevi tussi sine multi sanguinis expectoratione, nisi violente nisu aliquid expuerit, affligitur. Omnes actiones animales sunt languidæ, viscera torpent, nervorum systema deprimitur, et corporis calor, infra quod naturâ fit, recidit.

Talia sunt permanentia symptomata imperfectæ oxydationis sanguinis. In hoc statu non semper permanent, sed intervallis abnormibus, exacerbationibus obnoxius ægrotus, quibus morbi symptomata vehementiora fiunt, cor palpitat, pectus constrictum sentitur, spiritus opprimitur, caput dolet, oculi prominent, labia, aures, lingua, et infra ungues colorem luridum, imo, cum morbus vehementior sit, atro-purpureum accipiunt. Anxietas intolerabilis, urina et fæces insciè evacuantur, corpus astanti frigidum sentitur, et tanquam extemplò animam efflaret, ægrotus apparet. Arteriarum systema debilibus pulsationibus palpitat, jugulares venæ turgent, vultus infla-

tur, et hominibus, qui strangulantur, similis fit, membrorum motus spasticus, maximam mentis et corporis agitationem indicat, qui status plenâ vi, diu manere nequit, itaque diuturniore aut brevior tempore systema in syncopen incidit, ex quo gradatim emergit, sed languidum et torpidum permanet, et coloris magis luridi quàm debet, et levibus causis applicatis, et sæpe nullâ obviâ causâ, symptomatum series jam descripta redit, et, ut puer ætate provehit, paroxysmi frequentiores et violentiores, atque remissiones minùs perfectæ fiunt, donec postremò symptomatis hydropicis supervenientibus, morbo confectus, subsidit.

Principii arterialis in sanguine deficientis effectibus sic generatim descriptis, cordis malè formati speciem unam seligamus, quâ foëtûs circuitus sanguinis adultâ ætate permanet, et ejus impulsionis rationem ad hæc symptomata producenda consideremus, et primo in corde ita formato rerum generalem statum investigemus.

Dextro ventriculo contrahente, sanguis impurus pulmones versus pellitur, sed consequentiam ductûs arteriosi aperti manentis, observa! sanguis

in aortam transit, quia multò minus nunc resistitur, quàm si per pulmonum ramos iret; hic unus est fons, unde sanguis venosus arteriali immisceatur, sed non unicus, portio enim æqualis per foramen ovale in auriculam sinistram, ad æquilibrium distentionis solummodo præstandum, transit.

Hac brevi enumeratione manifestum est, citiùs aut diutiùs sanguinem maximè venosum in arteriarum systemate accumulatum evenire, et quum hoc ad certum gradum pervenerit, intellectu facile, quamobrem corpus debile fit, arteriarum pulsatio fluctuat, cor vibrat, vires vitales gradum sistunt, et æger maximam anxietatem et pectoris oppressionem exprimit, quæ partim ad sanguinem in corde adulteratum, et partim ad consensum inter cor et pulmones, referri possunt.

Causâ paroxysmi occurrentis ita generatim explicatâ, quodcunque circuitum sanguinis abnormem reddit, paroxysmi accessum accelerat: tunc enim, è vasculorum contractionum frequentâ, sanguis per cordis ventriculos velociùs transmittitur, et sic sanguis venosus in arteriarum systemate sæpius formatur. Sic breviori tempore

symptomatum series inducitur, quæ, quàmvis longinquo tempore, sine dubio sequuta esset.

Ex hac rudi lineatione promptè percipimus, quicquid aut corpus aut mentem agitat, pernicipiei esse debere, quum symptomata jam memorata inde recurrant, et tali casu medicinæ parum juvent. Quicquid cibi concoctu difficile sit, evitandi attentio accurata, integra prohibitio omnium cardiacorum, uti vini et alcoholis, nisi ut medicamenta præscribentur, simul cum curâ vigilante, ad iræ impetus abnormes cohibendos, hæc, omnia quæ ad extenuationem pertinent, complectantur. Dico extenuationem, nam dum cordis formatio morbida perstat, curatio perfecta perfici non potest.

Oxymurias potassæ, aliæque materiæ, quales in parvâ volumine, magnam oxygenii quantitatem includunt, et facilè denuò demittunt, miserâ quidem hypothesi laudatæ fuerunt, sed defecerunt, ut sine distinguendi viribus magnis prædici potest. Nam si oxygenium tantum deficeret, tum ejus inhalatio plus præstaret, tunc enim sanguini propiùs applicaretur, et vires in eo per iter minus circumiens exhiberet, quàm si in systema per digerendi organa introduceretur.

Sed quicumque rem propiùs inspicit, simul percipere potest, oxygenium solùm non esse suffecturum, aliquid præterea est parandum, aliquid dico, quod humanum ingenium nunquam adhuc, et verisimillimè, nunquam omnino indagabit. Pulmones pro meris chemicis vasis, sanguinem et gasa digerentibus, non inserviunt, minimè verò : officio majore funguntur, affinitates existentes extinguunt, partes aëra componentes in particulas ex quibus efficitur, separant, has ad corpus nutriendum admovent, et ei vitalitatem tribuunt. Hæ vires ab aliquâ re, quæ è chemico apparatu provenit, separatæ et distinctæ sunt *.

His observationibus de causis et consequentiis imperfectæ sanguinis oxydationis præmissis, singulas diversas species malè formati cordis, quæ morbidæ conditioni fluidorum in circuitu moventium originem dant, enumerare paratus sum.

* Pleuræ pulmonalis adhæsiō latè patens, ad Diaphragma et pleuram costalem imperfectæ oxydationis symptomata bene definita producit. Hujus generis exemplum perfectissimum numero septimo Medici et Chirurgici Diarii Edinensis à Doctore MARCEL narratur, et de modo, quo hæc causa imperfectæ oxydationis sanguinis agit, explicatio sagacissima et accepta offertur.

In malas formationes cordis, quæ malam oxydationem sanguinis proferunt, digerendo, sequentem ordinem persequar *.

SPECIES PRIMA.—Ubi aorta ex ventriculo dextro et sinistro æquè oritur.

SPECIES SECUNDA.—Ubi ductus arteriosus et foramen ovale patentia manent.

SPECIES TERTIA.—Ubi ductus arteriosus deletus, sed foramen ovale pervium manet, seu os præter naturam apertum, ab uno in alterum ventriculum ducit. Hæ malæ formationes, ut effectum producant, cum ampliatione sinistri cordis lateris, aut reductione diametri pulmonariæ arteriæ complicari debent.

SPECIES QUARTA.—Ubi arteria pulmonaria in origine impervia, parvam sanguinis quantitatem ductûs arteriosi actione retrogradâ adhuc accipit.

* ALLANI BURNS Prælectiones Audi,

SPECIES QUINTA.—Ubi cor ex duobus cavis auriculâ et ventriculo constat, et ubi ex ventriculo oritur vas, quod postea in duos ramos, unus ad pulmones, et alter ad corpus, dividitur.

Sub unâ aut aliâ harum quinque specierum omnes varietates malæ formationis, quæ repertæ sunt, et quæ imperfectæ sanguinis oxydationi originem dant, ut puto, digeri possunt. Si tamen utramque speciem sigillatim describerem, et diversa exempla memorata colligerem, hanc thesin nimis ampliarem. De utrâque specie igitur pauca tantùm observanda, et unum aut alterum exemplum narrando, utraque explicanda. Speciem primam breviter considerare pergam, ubi aorta ex ventriculo dextro et sinistro æquè oritur.

Quomodo hæc species sanguinem corrumpit tam manifestum est, ut indicare esset supervacaneum. Si aorta ex ventriculo dextro et sinistro æquè oritur, ut hæc cava uno eodemque tempore contrahunt, sic pars sanguinis puri et impuri in arteriam magnam propelli debet, quæ sanguinem commistum corpori distribuit, et symptomatum seriem terribilem jam descriptam, paucitatis prin-

cipii vitalis in sanguine comitem, profert. Aorta ab utroque ventriculo oriens, à SANDEFORT reperta est, quod in Observationibus Anatomicis et Pathologicis, cap. i. pag. 10. describit. Communicare cum utroque ventriculo à Doctore NIVEN observata est aorta, qui ægrotantis historiam ante obitum in Doctoris DUNCAN Medicis Commentariis delineat.

In his duobus exemplis, æger vitam miserriam egit, è minimis causis imperfectè oxydati sanguinis paroxysmis obnoxius, et tandem cum symptomatibus hydropicis mortuus est.

Secunda Species.—Ubi ductus arteriosus et foramen ovale patentia manent.

Hæc foramina aperta in fœtu tantùm utilia, et igitur paulo post partum plerumque clauduntur. Foraminis ovalis valva enim auricularum septo adhæret, dum ductus arteriosus sine dubio deletus est, nam in ligamentum impervium, quod arteriam pulmonariam aortæ alligat, convertitur. Hoc sine variatione non semper evenit, nonnunquam exemplis offendimus, in quibus ductus arteriosus et foramen ovale post partum patentia manent;

et quodocunque hoc accidit, cordis structura imperfecta, symptomatibus magis aut minùs vehementibus secundùm causæ excitantis vim, notatur. Cui rei in sanguinis circuitu fœtûs prosint, exploremus, et primo conspectu certiores fîemus, ut æquam magnitudinem in duobus cordis lateribus conservent, et hoc ita efficiunt. In fœtu nondum nato, pulmones in thoracis cavo torpidi, compressi, et penitus inertes jacent : ante partum fœtui omnino inutiles, et eorum munere, alterum organum dictum placenta, fungitur. Pulmones collapsi, per se totum sanguinem facilè et tutò transmittere non possunt. Sed huic rei quid remedium? Sanguis in circuitu, novo canali currit, pars rectâ viâ ab arteriâ pulmonariâ in aortam, per ductum arteriosum, tubum ab unâ ad alteram extensum, transit. Hoc modo sanguis superfluus à pulmonibus fœtûs removetur. Sed memoratu dignum, hunc apparatus pro tempore tantùm, et fœtui solùm esse utilem. Quum primùm enim infans in lucem venit, pulmones adhuc inertes, summis viribus se exercent, bronchia aëre ad plenum distenduntur, ductûs arteriosi usus supersedet, totus sanguis per dextrum ventriculum emissus, per circuitum pulmonum à sinistro ventriculo in aortam transire potest. Sed ut

ventriculus sinister, dum foetus in utero mansit, duos trientes sanguinis per arteriam pulmonariam tantum accepit, sine alterâ formatione hoc cavum nihil amplius post partum foret. Ne hoc tamen occurreret, foramen ovale additur. Ductus arteriosus et foramen ovale se invicem æquant, sanguinis portio ei æqualis, per foramen ovale in sinistram auriculam mittitur, quæ per ductum arteriosum in aortam transmittitur; quâ arte, sine pulmonum operatione, sine foetus systematis vascularis læsione, duæ auriculæ æquali magnitudine manent, sinistra omnem sanguinem per dextram emissum accipiendi est capax. Quo tempore tamen pulmones agere incipiunt, placentæ accessat, et ductus arteriosus foramenque ovale appendices noxiæ fiunt, et denique ad ea perdenda operationum series, incipit.

Nonnunquam ex defectu aptitudinis et concordiae inter diversas vascularis systematis partes, natura in penso peragendo frustratur, foramen ovale ductusque arteriosus pervia manent, dextrum latus sanguinem comprehensum, sinistri puro sanguini miscere adhuc perstat, et symptomatibus, quæ imperfectam oxydationem sanguinis distinguunt, originem dat. Ad hoc indagandum

circuitum sanguinis in fœtu consideremus. In fœtu nondum nato, auricula dextra sanguinem à venâ umbilicali, sive à vase quo sanguis purificatus à placentâ redit, accipit, dextrum latus igitur ante partum purissimum sanguinem continet, sed aliter cum puer natus sit, pulmones suo speciali munere funguntur, pro placentâ, noxium et venosum principium à sanguine secernunt, et ab eis sanguis purus et arterialis, per venas pulmonarias ad cordis latus sinistrum redit. Si sanguinis circuitus in fœtu post partum perstaret, maximè incommodum esset, ut ex historiâ sequentis exempli, à viro eximio et doctissimo JOANNE BURNS observati, à quo inserere mihi permissum est. Hæc præparatio anatomica, in elegantissimo celeberrimi et ingenui Professoris Anatomices Doctoris MONRO tertii in urbe Edinensi museo, servatur.

T. M. sanus et robustus puer apparebat, sed tertio ætatis anno morbi signa indicare cœpit, quæ, ut adolesceret, augebant, et postremò in sepulchrum eum perducebant. Prima symptomata morbida in musculorum systemate præsertim animadvertiebantur, si quando in juvenili ludo supra vires nitebatur, spasticis vellicationibus musculo-

rum corporis, comitatis vehementi tussi, et dispnoæ paroxysmis iteratis, corripiebatur; et nonnunquam, paroxysmo durante, cutis color in delutè purpureum, aut sublividum colorem mutare observabatur. Cessatio à se litendo, ad vires solitas restituendas plerumque satis erat, sed nisûs iterationem phænomenorum morbidorum reditus fere sequebatur. Tribus prioribus vitæ annis, solitos infantiae morbos perpessus est, et variolâ graviter afflictus est, sed hi in præcipui morbi statu nihil mutabant, cujus symptomata per spatium quadraginta duorum annorum prope in eodem statu permanebant. Per totum hoc tempus, suæ arti pictoris se dare potuerat, dimidio posteriore valetudinarius et torpidus videbatur. Hoc tempore, symptomata omnia vehementiâ paulatim augebant, paroxysmi sæpius quam antea redibant, leviorum causarum operatione incitabantur, et diutiùs permanebant. Vultus sine ullâ intermissione lividus et tumidus, labia, infra ungues, omnesque partes molli epidermide tantum tectæ, atro-purpurea, et anxietas et pectoris oppressio intoleranda fiebant, vitæ officia imperfectè explebantur, œdema generale supervenit, corpus frigido et viscido sudore fere constanter irrorabatur, appetitus discedebat, arteri-

arum pulsatio vix percipi poterat, debilitas extrema, anxietas et dyspnœa celeriter augebant, et defatigatus, mortuus est.

Corpore examinato, thorax circiter libram fluidi aquosi lutei continere reperiēbatur. Pulmones passim integri, et absque adhæsionibus, pericardium circiter duas uncias fluidi fuscioris, quàm in thoracis cavo effusi, continebat, sed præcipua phænomena morbida, in corde et magnis vasis deprehensa sunt, in altero ductus arteriosus, et in altero foramen ovale patentia reperta sunt. Ille magnam cornicis, et hoc anseris pennam magnitudine æquabant. Hujus rei ratio facile reddi potest, si diversam sanguinis velocitatem et impetum in auriculis et arteriis recordemur. Denique, venas testis et urinæ organorum valde ampliatas et varicosas esse, observandum. Cerebrum, et abdominis viscera omnia sana et salubria.

Species Tertia malæ cordis formationis nunc consideranda, ubi ductus arteriosus deletus, sed foramen ovale pervium manet, seu os præter naturam apertum, ab uno in alterum ventriculum

ducit. Hæ malæ formationes, ad aliquid efficiendum, cum ampliatiōe sinistri cordis lateris complicari debent.

Et foramen ovale et ductum arteriosum patentia raro invenimus, sed foramen ovale pervium in adultâ ætate sæpius observamus, et hoc ex duabus causis oritur.

1mo. Foramen ovale nonnunquam pervium, ex cordis sinistri lateris præter naturam ampliatiōe, quo sanguis è dextro in sinistrum latus transire adhuc persistit : aut nonnunquam auriculæ dextræ, et arteriæ pulmonariæ diminutione, apertum retinetur.

2do. Foramen pervium maneat, quia valva et septum auricularum coalescendo minimè idonea sunt, aut actione delendi cessante, postquam aliquantùm progressum sit, in quibus ambobus omnia cordis cava, salubres proportionēs sibi invicem retinere suspicamur.

Quod ad foraminis ovalis patentis persistentis effectus attinet, nisi diversa duorum laterum magnitudo alicujus momenti sit, nulla symptomata

vehementia inde oriri, est observandum. Sed deinceps memoratu dignum, quum sinistrum latus multò majus quàm dextrum sit, symptomata sanguinis oxydationem imperfectam comitantia, bene definita, et penitus conspicua fore. Dominus ALLANUS BURNS unum exemplum vidit, ubi hæc conformatio, sanguinis oxydationem imperfectam solitis phænomenis insignitam produxit. Sed ut axioma in prælectionibus proponit, inæqualitatem cordis laterum rarò esse ita magnam, ut imperfectam sanguinis oxydationem induceret, sæpe tamen hanc constructionem asthmatis symptomata insignita afferre invenit, et nonnulla exempla enumerat, ut probaret, foramen ovale patens persistens seriem signorum pathognomonicorum lævis defectûs principii arterialis in sanguine inducere posse. Quum foramen patens retineatur, propterea quòd valva adhærendo non est idonea, hoc ante mortem rarò cognoscitur; nunquam quidem quum non est inæqualitas inter amplitudinem cordis lateris dextri et sinistri, ubi symptomata magis aut minùs perspicua secundùm inæqualitatem fiunt.

Foramina præter naturam formata, in ventriculorum aut auricularum septo eodem modo a-

gunt, quod exemplo ab illustri anatomico, et docto physiologico Doctore GULIELMO HUNTER, explicari potest, quod ex observationibus et investigationibus medicis transcribam *.

Puer primogenitus parentum, octavo mense secundum matris computationem natus est. Ut partus naturalis erat, infans more solito nutrici traditus, et matri circiter sextam horæ partem debita cura est adhibita. Quum puerum vidi, qui more solito spirare et flere mihi primò visus est, nutrix manu et ore signum significans, aliquid esse præposterum, mihi dedit; loqui non ausa est, ne terrorem matri injiceret, sed puerum paroxysmo laborare mihi susurravit.

Cutis passim nigerrimus, et spiratio difficilis, sed species maximè insolita, erat cordis palpitatio ita violens, ut extrinsecùs procul videri posset, constantem et violentem præcordiorum motum servans. Quum manum in parte retinebam, palpitatio me terruit.

Pueros atros, et spirito laborantes, aliquamdiu

* Vide vol. vi. pag. 291.

post partum videre solitum est, itaque flendo, sternutando, aut tussiendo, broncheas phlegmate expurgari, et symptomata paulatim discedere sperabam. Naso et ori volatilia applicabam, calidis frictionibus utebar, et quàm primùm parari posset, enema injici jussi, quod statim alvum evacuat. Sed aliquid in hoc casu esse speciale, et verisimiliter immedicabile citò certior factus sum. Emplastrum cantharidum cervice applicari præcepi, et familiam de periculo monui. Cum medico familiæ ægrotos curante consului, et, me nulli emolumento puero esse, citissimè mihi erat manifestum.

Tredecim dies vixit, quo tempore maximè insolita palpitatio cordis permansit. Nigritudo cutis nunquam discessit, sed nonnunquam tantùm imminuebatur, et tunc in lethalem, et palidum cinereum colorem mutabatur. Color coccinus vix unquam apparebat, nec emplastrum cantharidum, nec enema, nec cathartica lenia, nec volatila, nec fætida, nec aquæ nonnullæ, ut remedia specialia, quæ in similibus casibus spem nunquam frustraverant, parentibus laudatæ, nihil unquam valebant. Parvulum cibi cepit, vix unquam suxit, et lacte à nutricis mammis detracto,

alebatur. Curâ sedulissimâ, diebus noctibusque ei auxilium præstiterunt. A primo intuitu, insolitam cordis palpitationem esse transituram, vix speravi. Secundo tertiove die ante obitum, tam oppressus et miserandus videbatur, ut nemo eum diutiùs victurum esse speraret. Sic depressus, convulsionibus affectus est, post quarum complures, è vitâ discessit.

Cadaver proximo die inspiciendum facile permissum est, ut morbi naturam certiùs cognoscerimus, et, si aliquid simile iterùm acciderit, majori usui forsitan esse possemus. Nihil insolitum uspiam, nisi ad et super cor detegi posset. Vasa plerumque, et præsertim venæ sanguine atri coloris distendebantur, ob eamque causam cor ipsum visum est, sicut ejus vasa coronaria fluido atri coloris prospero eventu injecta essent.

Hujus exempli erat vasis pulmonarii præter naturam conformatio, quod principio à dextro ventriculo in solidam substantiam penitus et absolutè imperviam, redigebatur, ita ut pulmones unam sanguinis guttam à corde per arteriæ pulmonariæ tubum non accepissent. Ventriculus dexter in sanguine transmittendo nulli usui

fuerat, et in eo vix ullum cavum relictum. Sanguis ad dextram auriculam à venis duabus cavis et coronariâ per foramen ovale, quod erat permagnum, in dextrum cordis latus, et inde in aortam; et nunquam per pulmones transierat, idcirco respirationis beneficium nunquam acceperat. Arteria pulmonaria, quamvis parva, passim nisi principio pervia, et ductus arteriosus parvulam sanguinis portionem ei suppeditaverat, qui ab aortâ retrogrado motu communicabatur. Hæc sanguinis portio tantùm, aliquid boni ex aëre et respiratione acceperat.

Cor sedulò perpensum sebo puro injeci; et quum aliquamdiu in alcohole servando duresceret, et auriculam et ventriculum dextri lateris aperui, et sebum excerpsti, ut horum cavorum statum accuratiùs indagarem. Canalis arteriosus totus speciali modo constructus. Non retrogrediens, ut arteriæ pulmonariæ truncus continuatus; sed sursum ad finem in aortæ curvaturâ ascendens, prope sub arteriâ sinistrâ subclavianâ, vel ex adverso è sinistro arteriæ pulmonariæ ramo ortus est. Sanguinem ab aortâ ad arteriam pulmonariam transmiserat, et igitur speciem rami aortæ potius quàm arteriæ pulmonariæ cepit.

Dextro ventriculo aperto, ferè caro solida esse videbatur, cum vix ulla pars cavi aperta permanerat. Nullum igitur sanguinis circuitum per dextrum ventriculum fuisse manifestum erat, utriusque venæ cavæ sanguis recurrens per foramen ovale ad sinistrum ventriculum in aortam transierat, inde per canalem arteriosum parva portio motu retrogrado, in sinistram arteriæ pulmonariæ ramum, et inde sine dubio per pulmones ad beneficium respirationis accipiendum, erat delata.

De quartâ specie malæ formationis, nihil descriptioni à Doctore HUNTER datæ in exemplo sibi occurrenti addam, quod exemplum hujus speciei nunc propono *.

Puer primogenitus parentum ob ægritudinem à partu insignis. Circiter octo annos natum primum vidi, et de eo consultus sum, et ad decimum tertium vixit. Figurâ maximè insolitus, prope tam procerus, quàm eâ ætate solitus, sed in ullâ corporis parte tam crassus minimè erat. Et quamvis insigniter macilentus, non tabidus; è contrario habitus naturalis videbatur. Si ali-

* Vide ut suprâ.

quis nullum alium canem nisi Molossum, exempli gratiâ, vidisset, primo visu gracilem et delicatum canem Grajum Italicum miraretur. Hujus juvenis figura, ejus animalis me admonuit, et præsertim cum crura aspexi, volucrum aquaticarum, quæ Grallæ dictæ sunt, recordabar.

Oris color nunquam vegetus, sed semper fuscus, aut ad nigrum tendens, summâ curâ educatus erat, et parens amans eum adulturum vix unquam sperare ausus. Optimi medici his temporibus salutem curaverant, et varii medendi modi parvo beneficio tentati erant. Symptomata maximè affligentia erant paroxysmi, semper periclitantes, nonnunquam violeptiores et frequentiores quàm aliàs, et generatim in urbe, quàm in rure molestiores, quamobrem in paternâ villâ complures annos mansit. Paroxysmum plerumque accedentem sensit, corde oppressus, imbecillior et languidior, colore fuscus, et tandem fere niger, factus est, decedit, et sensu carens visus est. Ex paroxysmo cum singultu, oscitatione, et fatigatione ferè citò se recepit. Spiritûs tumultus, et motus agilis corporis paroxysmum sæpe induxit, et per aliquot novissimos vitæ annos, cum paroxysmo superveniente, se omnino effugere, aut sal-

tem violentiam, et diuturnitatem imminuere posse, in tapete sinistro latere extemplo procumbendo, et in eo situ immotus manendo, suâ observatione invenerat. Hoc periculum bono exitu factum vidi.

Hoc exemplo attentè considerato, cor speciali modo formatum, quod nullum medicamentum pertingere, aut emendare potuit, ratus sum. Nihil igitur præscripsi, nisi ut quàm maximè tranquillus victu modico rure degeret. Patri qui eum diutiùs victurum desperabat, si in paroxysmo discesserit, se venia indignum, si ægritudinis causam indagandi occasionem nègligeret, suggessi.

Filio mortuo, ad corpus quàm maximè privatim examinandum me arcessivit, ne aliquas cognatas offenderet.

Causa morbi manifestissima, cordis conformatio erat enormis, quæ minimam sanguinis portionem per pulmones transire permisit. Arteria pulmonaria tam parva in principio à dextro ventriculo, ut parvum instrumentum ad vulnera exploranda accommodatum vix transire posset, quâ

re priori exemplo aliquandò simile erat. Sed altera res peculiaris, quâ exemplo à Doctore PULTNEY narrato, erat simile, viz : Cordis septum ad basin defecit, ita ut in cadavere pollex parvus ab uno ad alterum ventriculum transversim transiret, cum aortæ orificium huic foramini tam propinquum positum, ut cordis actione sanguinem à dextro ventriculo æquè ac sinistro acciperet.

His duobus exemplis tertium aliquantò simile, ex museo anatomico HUNTERIO, eis supra memoratis, à me nunc additur.

Nihil ampliùs de hujus pueri historià, cujus cor deinceps describendum, quàm abortivum mense sexto esse, cognitum est. In nostrum conclave dissecando aptum illatus est. Dominus CRUIKSHANKS cordis præparationem fecit, cava dextri et sinistri lateris aperiendo, ut foramen ovale, et valva utrinque distinctè viderentur. Foramen in ventriculorum septo ad cordis basin tunc observavit, per quod anseris penna ab uno in alterum ventriculum facilè transiret. Foraminis ora in circuitu lævis, ita ut à primâ formatione extitisse manifestum esset. Nihil aliud pe-

culiare in hoc parvo corde, præterquam quod foraminis ovalis valva non modo tenuissima, sed cribriformis, parvorum foraminum multitudine, instar laciniaë, perforata, ut valvam nobilem admodum adolescentium vidimus.

Species ultima est rarissima.—Unicum exemplum à Domino WILSON, anatomices Londini prælectore, descriptum reperi. In hoc exemplo præter malam formationem, erat positio mala; cor enim in abdomine fuit positum. In puero diem septimum agente accidebat. Saccus membranaceus à sterno ad umbilicum continuens distinctè observabatur. Hoc aperto, cor comprehensum in ipso hepate reperièbatur. A pulmonibus ita remotum, multum mutatum esse debet. Ex unâ auriculâ unoque ventriculo constitit. E ventriculo arteria magna orta est, et in thoracem ascendit, ubi in duas divisa est, altera, aortæ more solito curvata, eique conveniens, altera ad pulmones instar arteriæ pulmonariæ transiens. A pulmonibus iterum per duas venas, venam cavam superiorem jungentes, auriculam introeuntes, rediit, dum inferior more solito reperta est.

Hoc cor formatione, cordi amphibio erat simi-

le, et sanguis in circuitu simili modo movebat.
Puer, sacco membranaceo gangrenâ putrescente,
citò mortuus est.

Observationes propositas de hac classe morborum cardiacorum ad finem perduxì, et antequam finireni, curationem conari esse futile, et profundissimam ignorantiam causarum symptomatibus morbidis originem dantium indicaturum esse, notatu dignum est. In morbis cordis, malum prævenire, quàm præsens remove potius debemus, et modum extenuationis morbi antea indicavi.

FINIS.

ERRATA.

- Pag. 10. lin. 16. *Pro divisae lege diviso.*
— 12. — 14. *Pro morbi lege morborum.*
— 16. — 10. *Pro exiturum lege exiturum.*
-

